

東
華
續
錄

東華續錄

同治九十八

臣王先謙敬編

臣張式恭恭校

八月丁丑朔以湖南永順府屬水災諭王文韶妥籌賑恤○戊寅祭大社大稷○諭軍機大臣等文麟奏回匪攻撲馬蓮井等處營堡派隊援剿一摺陝回大股由敦煌西竄先後圍攻馬蓮井塔爾納沁營堡勢甚猖獗文麟見派馬隊馳赴塔爾納沁援剿著卽飭令統領魏忠義等會同該處兵勇嚴密堵禦實力剿擊毋任逆匪竄越該逆擁眾奔突誠恐竄入東山益形滋蔓並著文麟咨會景廉及巴里坤城大臣總兵等一體嚴防毋稍大意將此由六百里諭令知之○辛巳直隸運河隄決諭李鴻章撫恤災民並飭江蘇等省籌撥賑款○壬午諭軍機大臣等都興阿奏邊外復起

股匪派隊剿除一摺奉天邊外匪徒滋擾熱河朝陽轄境經都興
阿派隊前往會同剿辦該官兵等於朝陽縣剿賊獲勝在東魯克
高山臺地方斃匪多名並將賊首孫洛疙疸擒獲正法其南路竄
匪亦經官軍隨時剿除著都興阿飭令派出各員會同熱河官兵
迅將竄逸餘匪悉數殲除毋畱餘孽崇實亦當飭令該地方官一
體嚴密按捕務絕根株將此各諭令知之○四川敘州府屬游匪
滋事官軍剿平之○榮全復以病乞免 上不許○予故雲貴總
督勞崇光建祠並予恆春祭葬世職○癸未崇實疏陳熱河圍場
積弊請暫緩起徵允之○戊子諭軍機大臣等景廉奏請飭成瑞
赴古助剿並陝回攻破馬蓮井營堡各摺片景廉帶兵駐紮古城
防剿正在喫緊遊擊陳升恆業經該都統遵旨飭令回巴里坤署
理總兵之任卽著景廉咨催署烏魯木齊提督成瑞迅速馳赴古

城襄辦一切陝回攻破馬蓮井營堡雖經官軍迎剿獲勝惟東西
兩路回逆聲息時通關內逆匪分竄安敦哈密深恐勾結烏城回
逆互爲聲援其勢又成滋蔓孔才一軍勢難分撥赴哈密廉已咨
催巴里坤迅派兵勇並飛咨金順所部駐紮安西之副都統明春
帶領兵勇就近往援惟賊勢正在鴟張兵力究形單薄著金順懷
遵疊次諭旨迅率所部剋期出關與景廉聯絡聲勢會埽逆氛毋
稍延緩並著左宗棠酌撥勁旅數營前往助剿兼顧巴里坤哈密
兩城文麟惟當就見有兵力勤加偵探認真防剿毋令賊匪蔓延
爲患將此由五百里各諭令知之○以湖北公安縣被水諭郭柏
蔭撫恤災民○召劉嶽昭入覲以岑毓英兼署雲貴總督由巡撫署○
庚寅諭內閣理藩院代奏土爾扈特汗布彥烏勒哲依圖賑濟該
遊牧流離貧苦蒙民請借支十年汗俸一摺布彥烏勒哲依圖著

東華錄卷之二十一
加恩賞借十年汗俸嗣後不得援以爲例○壬辰諭軍機大臣等
景廉奏哈密被圍撥兵馳救並請飭烏城迅撥馬隊赴巴哈援應
派援沙山子官兵剿賊獲勝常順等奏賊氛竄近撥隊迎剿各摺
片陝回竄擾哈密盤踞大泉黃蘆岡一帶分股撲城官軍迎剿失
利統領魏忠義張忻李琦李生元等皆無下落官兵多有陣亡巴
里坤亦有逆回分竄巴哈兩城爲西進大軍後路地方最關緊要
北股回逆勢極猖獗見在哈密被圍甚急該城日夜盼援景廉業
經籌撥馬步隊前往援應惟賊眾兵單勢難抵禦且道路窵遠尤
恐緩不濟急左宗棠見已馳抵肅州兵力自厚肅州以窮寇拒守
孤城諒不難剋期攻拔刻下關外事機甚急萬一肅州踞逆鋌而
走險勢必與竄擾巴哈等處賊匪聯成一氣該兩城稍有疏失則
賊勢又復燎原關外用兵較之內地更形棘手大局何堪設想目

下烏垣安夷回逆又時有東犯之意景廉孤軍在外兵力難支著左宗棠迅卽撥派勁旅數營馳往哈密以資援應速將該處賊匪悉數殲除並堵截肅回出關分竄之路哈城事機十分緊急該大臣務當迅籌調撥毋稍遲緩致誤戎機金順一軍疊經諭令剋日出關以資防剿見在該處情形較前更急著該前將軍迅卽拔隊起程並先行撥派得力官兵馳往接應與明春一軍會同雕剿迅掃逆氛景廉亦當酌度情形妥爲籌布哈密地方緊要文麟當就見有兵力妥籌堵剿毋稍疏虞巴里坤已有賊匪竄近著慶壽勤加偵探實力防守以顧地方烏里雅蘇台見駐吉林黑龍江馬隊及察哈爾官兵尙稱得力著常順多布沁扎木楚文奎妥爲調度迅撥馬隊數百名由草地兼程馳赴巴哈以資援應賊匪竄及沁城喀喇烏蘇等處與烏城所屬蒙古部落毗連常順等見已派撥

官兵前往迎擊卽著飭令認真勦洗毋令賊勢蔓延景廉所派往援沙山子之營總依勒和布一軍與遊擊徐學功等勦賊出力准由景廉擇尤保獎以示鼓勵陣亡官兵著查明請卹將此由六百里諭知左宗棠常順多布沁扎木楚文奎景廉金順文麟並傳諭慶壽知之○諭榮全英廉查看厄魯特官兵並沿途臺站情形請調宣大官兵駐防塔城各摺片厄魯特官兵屢經催調尙未移至塔城英廉以該官兵等困苦路遠恐難遷移擬親赴布倫托海查看情形再行籌辦著英廉於馳抵該處後將厄魯特近日情形畱心查看加意拊循能否遷移來塔務與榮全商酌妥協迅速具奏塔城東路各臺無力應差致經過官兵軍火運送多有耽延並著英廉沿途周歷履勘應如何設法整頓之處一併妥商辦理塔城向有甘省換防兵七百名駐紮防守近因道路未通難以調派

刻下瑪納斯等處賊勢猖獗防務喫緊必須兵力鎮撫方免疏虞榮全等請暫由宣化大同兩鎮各撥兵五百名駐守係爲思患豫防起見著李鴻章鮑源深於宣化大同官兵內挑撥精壯五百名攜帶軍火器械分起赴塔駐防俟嘉峪關道路疏通再照舊章由甘省撥兵換防並著戶部將此項官兵餉稍寬爲籌撥源源接濟毋令缺乏將此由五百里各諭令知之○癸巳諭李鴻章等迅解吉林俸餉○乙未諭軍機大臣等景廉奏派援巴哈兩城並擬親往督隊暨請飭金順出關左宗棠籌辦軍糧請派署哈密幫辦大臣常順等奏派隊協勦各摺片關外回匪竄擾巴哈兩城哈密被圍甚急景廉見派吉爾洪額沙克都林扎布統帶馬步隊前往救援惟此股回逆人數甚眾悍賊尤多非厚集兵力難圖勦洗著景廉飭令吉爾洪額等兼程前進迅速馳援該都統將濟古兩處防

守妥爲布置卽著督帶兵勇親往援應毋稍稽遲該處地方爲西
進大軍糧運後路刻下哈密城圍甚急萬一稍有疏虞則不獨西
進大軍糧路阻絕卽肅州全局亦爲掣動金順前有帶兵西進之
請見在關外情形較關內十分緊急該前將軍曾否起程著懷遵
疊次諭旨趨程前往並先撥得力官兵星馳前進會同明春各隊
迅解哈密之圍並著左宗棠飭令各屬認真籌辦軍糧在玉門地
方安設轉運糧臺以資接濟該大臣仍當懷遵前旨速撥勁旅數
營馳赴巴哈兩城迅掃賊氛毋得顧此失彼金順一軍屢次嚴諭
剋期出關見在哈密被圍情形如此緊急若再遷延不進致誤事
機定將金順從重治罪左宗棠所部甚厚儘可分撥出關刻下關
外賊勢鴟張巴哈兩城盼援甚急若坐視不收致該城稍有疏失
定惟左宗棠是問明春見已簡放哈密幫辦大臣責無旁貸著卽

督率兵勇認真勦辦力解城圍該城防守事宜著文麟就見有兵力妥爲布置毋稍貽誤巴里坤與哈密毗連東西北三路皆有賊匪竄擾著慶壽勤加偵探固守城防嚴飭兵勇遇賊卽擊常順等已派察哈爾一起官兵馳往巴里坤一帶會同前次派出達密蘭防軍共圖援剿卽著飭令該官軍迅赴前敵實力雕勦儻事機緊急仍著常順多布沁扎木楚文奎就近撥兵前往以資援應毋得稍分畛域將此由六百里加緊諭知左宗棠常順多布沁扎木楚文奎景廉金順文麟明春並傳諭慶壽知之○戊戌內閣學士宋晉請擇修直隸河渠以工代賑下李鴻章議從之○以蘇勒布爲左副都御史由大理寺卿遷○癸卯諭軍機大臣等文麟奏回匪圍攻營堡調隊應援請飭部撥銀兩各摺片陝回大股會合東路竄匪倡脅纏頭回眾圍攻哈密城堡勢甚猖獗亟應迅速勦洗文麟見已

咨會景廉金順派兵救援前據景廉奏巴里坤哈密軍務緊迫該都統已派吉爾洪額沙克都林扎布帶隊援應卽著景廉飭令孔才並派出各隊兼程前進該都統將濟古兩處防務布置妥協卽懷遵前旨督率兵勇迅速回援毋稍遲緩明春已授哈密幫辦大臣迅卽督率兵勇前赴哈密會同勦辦金順一軍屢次諭令出關見在哈密情形緊急務當迅率所部剋期起程毋再遷延干咎同王福晉暨伯克頭目等深明大義均屬可嘉回城被匪攻陷後該王福晉等見在何處著文麟查明具奏並傳諭該王福晉等迅速招集回眾毋任去而從賊左宗棠當懷遵疊次諭旨分撥兵勇出關助剿一面兼顧金順糧運毋令缺乏肅城賊勢久蹙該大臣親赴前敵督勦軍聲日振卽著激勵將士趕緊進攻迅將城池克復並嚴防窮蹙敗匪乘閒逃竄出關是爲至要統領魏忠義打仗失

利文麟請將該員革職並自請治罪本屬咎有應得姑念賊眾兵單情尚可原均著加恩寬免仍責成該辦事大臣就見有兵力將城防事宜嚴密布置不得稍有疏虞致干嚴譴哈密餉迫切所需兵糧由各路採買均應速撥款項以濟要需著戶部撥發軍餉見銀十萬兩糧價見銀五萬兩解交察哈爾都統衙門收存由文麟委員候補道常祥等領解赴哈俾供支放將此由六百里各諭令知之○乙巳賞普濟堂功德林賑米八百石

九月己酉諭軍機大臣等崇實奏剿辦賊匪獲勝情形一摺匪首莊洛三等在哈立套力改地方聚眾焚掠分股圖犯朝陽縣境經崇實派令署知縣陳本植等帶隊進剿立將股匪擊散莊洛三率黨退回巢穴官軍跟追圍剿殲斃賊黨多名賊始逃竄該匪竄回靠邊屯將家屬送往賓圖王旗藏匿復被奉省官兵中途截擊熱

河馬隊焚毀賊巢沿途追殺擒獲悍黨屈幅潰等正法勦辦尙爲得手惟東荒地方遼闊匪首莊洛三等見尙逃逸著崇實督飭派出兵勇及古北口練軍探蹤搜捕都興阿亦當檄令奉省官兵會同兜勦務將首要各犯悉數殲除以靖地方毋令死灰復然致成滋蔓將此各諭令知之○庚戌飭山東等省迅解庫倫協餉○辛亥諭軍機大臣等常順等奏探報竄賊情形請調員統帶防軍哈密委員運解軍械中途遇賊各摺片回匪大股出關滋擾圍攻哈密其另股竄向諾木托羅蓋地方常順等見令達密蘭率所部迎勦並飭依楞額帶隊赴巴里坤臺路駐紮以遏三塘湖等處竄匪卽著督令該官兵等嚴密堵禦確探匪蹤實力勦擊巴哈軍情緊要並著常順多布沁扎木楚文奎懷遵前旨檄飭防軍前往援應以勦爲防不得意存畛域逆匪股數眾多邊外地方遼闊亟需厚

集兵力以杜奔突著杜嘎爾卽將見駐紮遠城臺路之察哈爾馬
隊移紮哈爾尼敦用資防剿哈密被圍情形岌岌景廉自己帶隊
回援卽著督飭吉爾洪額等軍星馳剿辦迅解城圍文麟當就見
有兵力穩慎防守明春卽率所部馳抵任所掃蕩賊氛金順一軍
此時已否起程卽著懷遵疊次嚴諭剋日馳往援剿該軍糧運左
宗棠當飭地方官妥速籌辦俾師行得以無阻並懷遵前旨派委
得力將弁前往會剿肅州一城疊據左宗棠等奏勢在垂克該大
臣復親往督師諒不難一鼓攻拔近日戰事如何著卽詳悉奏聞
以慰廑繫前派赴榮全軍營之侍衛特爾慶阿准其調赴烏城以
資得力哈密委員運解軍火被賊搶掠當經官兵奪回著飭俟臺
站疏通再行護解前進毋資寇兵將此由六百里各諭令知之○
癸丑回逆竄偏科布多諭署參贊大臣托倫布等嚴防○乙卯諭

內閣李瀚章等奏土匪滋事擒獲首要各犯懲辦一摺湖南臨湘縣藥姑山地方於本年七月間突有土匪傅春琳等聚黨結會搶劫滋事李瀚章等飭令提督劉維楨等帶兵前往會拏該匪膽敢拒捕經派出各軍先後擒獲匪首傅春琳等並匪黨多名訊明正法其竄逸之匪該提督等分投搜拏續獲王洸保等審明懲辦並將匪巢平毀地方一律肅清湖南會匪疊經滋事見雖立時撲滅仍恐伏莽未淨復行勾結爲患著李瀚章郭蔭柏王文韶督飭文武各員會同嚴密接查以靖地方並著飭令地方官力行保甲毋得徒託空言○丁巳諭軍機大臣等杜嘎爾奏嚴布防探豫籌堵擊一摺陝回出邊撲犯巴哈等處哈密被圍甚急前經諭令該副都統將見駐紮遠城臺路之察哈爾馬隊移紮哈爾尼敦用資防剿卽著杜嘎爾懍遵前次諭旨迅速移紮毋誤戎機一面嚴飭派

出官兵巡護糧路勤加偵探遇賊卽擊毋稍疏虞另片奏請飭山西將撥補餉銀迅卽籌解等語此項餉銀係該省應行抵還杜嘎爾劃撥之款見在該營防剿正急需餉甚殷著鮑源深迅將應行撥補餉銀二萬五千兩趕緊籌備務於九月內解至察哈爾以濟急需毋得稍有延緩將此由五百里各諭令知之○戊午調察哈爾馬隊一千名赴烏里雅蘇台防剿○辛酉命於安定等六門設厰煮賑並賞宛平縣賑米一千八百石通州賑米一千石○壬戌命錢鼎銘添撥河工防險銀五萬五千兩○癸亥諭軍機大臣等景廉奏續派馬隊馳援哈密一摺據稱陝回大股見在竄往紅廟子地方恐該逆西竄則古城防務更形喫緊該都統未能帶兵赴哈見添派營官田錫禮等帶隊前往應援等語卽著景廉飭令該營官等星馳前進並飭前派赴哈密之吉爾洪額等迅速進剿立

解城圍刻下古城防務固屬緊要而哈密盼援尤急該都統務當斟酌情形妥籌兼顧文麟當就見有兵力妥爲防守毋稍疏虞明春著懷遵前旨迅率所部前赴任所力掃逆氛左宗棠此時已否撥隊赴哈會剿務當迅派得力將弁前往救援毋稍延緩金順一軍疊經諭令出關該前將軍卽督率隊伍刻日馳往援剿該軍糧運仍著左宗棠飭地方官妥爲辦理俾利師行刻下肅州情形若何殊深厯繫左宗棠親赴前敵自不難立拔堅城著卽督飭各軍奮力攻克迅奏膚功以靖邊圉將此由六百里各諭令知之○飭廣東山西迅解西征協餉○甲子諭軍機大臣等文麟奏馬隊官兵剿賊疊勝接據敦煌稟報賊情並賊匪圍攻營堡請飭催援兵來哈暨軍糧缺乏請催錫綸回任各摺片所奏應援塔爾納沁及馬隊剿賊情形尙係閏六月間之事刻下賊匪勾結回城纏頭圍

攻哈密營堡甚急前經疊次諭令左宗棠等迅速派兵援應乃各路官兵均無到哈信息該城日夜盼援事機刻不容緩吉爾洪額等軍計已行抵巴里坤距哈甚近卽著景廉飭令該副都統等趨程前進速解城圍文麟一面派員迎提母任藉故逗留致誤大局景廉續派之馬隊三百名並著飭令田錫禮迅速統帶前往以資接應孔才所部馬隊並黑龍江馬隊景廉務當移緩就急飭令兼程赴哈會同各軍迅速掃逆氛金順總未據報出關殊不可解該軍兵力頗厚著卽懷遵疊次諭旨剋期前進並先派得力將領統帶馬隊星夜馳援不得貽誤戎機致干重咎左宗棠諒已派隊起程著卽催令派出官兵迅速前進毋稍遲延金順一軍糧運仍著該大臣飭令地方官妥爲辦理錫綸已授爲烏魯木齊領隊大臣所遺哈密幫辦大臣早已簡放明春屢經催令帶隊星馳赴哈卽著

會同文麟將該城防守事宜悉心籌畫以顧地方並將起程及到哈日期迅速奏聞文麟見在病勢若何殊深廕繫目下事機緊迫該大臣仍當妥爲籌布力任其難以期毋負委任該城屯糧被賊搶掠軍食缺乏殊屬可虞著左宗棠景廉妥爲設法力籌接濟將此由六百里各諭令知之○丙寅諭內閣刑部奏已革烏魯木齊提督成祿押解到部請旨辦理一摺著軍機大臣會同刑部審訊按律定擬具奏○賞五城貧民棉衣銀○己巳諭戶部撥銀十萬兩備察哈爾征兵軍裝口糧○庚午諭內閣王文韶奏匪徒滋事拏獲懲辦一摺湖南安化縣地方茶市最盛向有防營礮船前往彈壓本年六月間突有匪徒在安化水路直達之益陽縣沙頭地方焚毀礮船溺斃哨弁謀搶茶行當由該地方文武拏獲魏老一等多名經王文韶提省訊明分別懲辦地方見已安靜其在逃之

匪首袁名揚仍著該撫嚴拏務獲究辦○壬申諭軍機大臣等朕
今歲恭謁 東陵稍申孺慕明歲新正當降旨恭詣 西陵直隸
今年被水道路能否暢行此次工程不能不藉資民力恐被擾處
所民力難支著該督酌度情形據實具奏將此諭李鴻章知之○
諭前於七月間據左宗棠奏圍攻肅城踞逆情形並親赴前敵督
勦該逆踞守孤城經官軍於克復東關後復於大南門外偪城修
築礮臺營卡賊匪飛走技窮諒不難剋期攻拔乃迄今兩月未據
該大臣續有奏報屢繫殊深見在關外陝回到處勾結勢極猖獗
哈密被圍甚急萬一肅逆被勦窮蹙竄出關外與各匪聯絡一氣
又成滋蔓難圖勢將不可收拾即使肅城克復而關外受害不可
勝言大局何堪設想左宗棠計已早抵肅州著卽督飭官軍力籌
進勦迅拔堅城務將該逆悉數聚殲萬不可使城賊乘間竄出致

貽大患哈密被圍日久業經疊諭該大臣迅速派兵往援究竟調撥何隊前往哈密爲西路要隘斷不可稍有疏虞仍著左宗棠懍遵疊次諭旨速卽派兵兼程前進迅解城圍力籌兼顧金順一軍曾否出關並著催令該前將軍懷遵疊諭星馳前赴哈密毋稍延緩致誤戎機所有圍攻肅州及馳救哈密各情形著該大臣迅速詳細奏聞以慰懸盼將此由六百里諭令知之○飭福建等省撥解西征軍餉○癸酉諭軍機大臣等劉長佑奏土豪被控抗審見在籌辦情形一摺廣西南丹土豪莫雲義藉團恣暴爲害地方其子莫五兇狡尤著屢被控告莫雲義竟匿居蠻洋山寨恃險負隅抗不到案該土豪稔惡多年漸形跋扈亟應捕拏懲治以儆刁頑劉長佑以該處地險寨堅驟難擒獲並聞其與黔省苗匪聲氣相通尤恐被剿窮蹙遁入苗寨重煩兵力該撫見已增調練勇二三

營派員統帶前往剿捕馮子材熟悉該處情形卽著就近督飭各營相機進剿務將莫雲義弋獲毋令漏網並著曾璧光酌撥兵勇扼紮交界地方以杜竄越毋令乘間潛逃致與苗匪勾結莫雲義到案後卽著劉長佑將被控各情逐一根究盡法懲治莫如勤等有無受賄蒙稟等情仍著劉長佑查明辦理另片奏遵查陳得貴等一案等語陳得貴業因另案參革李玉墀究竟見在何處有無不法情事仍著該撫密飭劉玉成確切查明並俟湖北雲南各督撫查覆後悉心覈辦將此由四百里各諭令知之○予貴州軍營病故提督宇文秀陣亡提督文德盛合建專祠○永定河漫口合龍○是月減免兩浙浦東等三場歉收上年竈課

冬十月丙子朔享 太廟○諭李鴻章籌撥熱河經費銀兩○丁

丑諭內閣御史沈淮奏請暫緩修理圓明園一摺見在帑藏支絀

水旱頻仍軍務亦未盡藏朕躬行節儉爲天下先豈肯再興土木之工以滋繁費該御史所奏雖得自風聞不爲無見惟兩宮 皇太后保佑朕躬親裁大政十有餘年劬勞倍著而尙無休憩遊息之所以承慈歡朕心實爲悚仄是以諭令總管內務府大臣設法捐修以備 聖慈燕憩用資頤養但物力艱難事宜從儉 安佑宮係供奉 列聖 聖容之所暨兩宮 皇太后駐蹕之殿宇並朕辦事住居之處略加修葺不得過於華靡其餘概毋庸興修以昭節省將此明白通諭中外知之○諭軍機大臣等都興阿奏請添調防軍一摺奉天地方遼闊時有賊匪嘯聚勾結巡緝防剿未可稍疏該省分防各路官兵尙須汰弱留強亟應厚集兵力以資防剿著奕榕德英卽行挑選精壯馬隊官兵各一百名揀派委參領以下等官管帶前赴奉省由都興阿分撥調遣並著該將軍飭

令分防各軍認真校巡實力剿捕以靖地方而消邊患將此由四百里各諭令知之○諭總理各國事務衙門奏川省毆斃司鐸教士見籌辦情形一摺據稱接准魁玉等函稱法國主教范若瑟遣教士張紫蘭潛赴黔江縣私買民房建堂傳教致該縣民人將司鐸余克林教士戴明卿毆斃與法國使臣照會所述不符請飭魁玉等迅速查辦等語四川黔江縣民人既有毆斃司鐸教士之案自應查訊明確及早持平辦結方足以服該主教之心免致另生枝節若日久耽延轉使該主教有所藉口且恐民心煽動將來民教滋事之案愈多辦理更形棘手著魁玉吳棠將此案詳細實情先行具奏一面嚴飭該地方官將案內下手正兇及幫毆從犯嚴緝務獲訊明啟釁根由分別按律懲辦並將見在辦理情形隨時咨明總理各國事務衙門以憑覈辦不得稍涉遲延將此由六

百里各諭令知之○戊寅賞八旗暨步軍綠營兵丁一月錢糧○
己卯諭軍機大臣等常順等奏圍偏哈密賊匪業經西竄見籌防
剿一招據稱景廉派撥沙克都爾札布等已經帶隊由巴里坤赴
哈密賊匪見向吐魯番一帶逃竄等語刻下賊蹤雖已西竄而哈密
城防未可稍鬆該處見在布置情形若何著文麟就見有兵力將
防守事宜悉心籌畫景廉亦當懷遵前旨妥籌兼顧均勿稍涉大
意其竄赴吐魯番賊股並著景廉派兵剿擊就地殲除毋任紛竄
常順等以關內外與喀爾喀處處毗連見仍派達密蘭所部馬隊
駐紮瑪呢達爾旗界以護蒙古遊牧卽著飭令該員加意防護毋
令賊蹤竄越仍著常順等勤加偵探如哈密軍情緊急卽飭達密
蘭帶隊馳援不得稍分畛域並著飭依楞額馬隊防護巴里坤臺
路毋稍疏虞明春此時已否赴哈著懷遵疊次諭旨迅速帶兵馳

往與文麟會商防剿毋稍遲延將此由六百里各諭令知之○諭

鮑源深迅解烏科兩城欠餉○壬午丁寶楨乞假修墓以文彬署

山東巡撫恩錫署漕運總督

由江蘇布政使署

○甲申諭軍機大臣等景

廉奏請停止運糧以紓臺力文麟奏固守哈密擊賊獲勝托倫布

等奏賊犯科屬撥隊迎剿各一摺哈密被匪圍攻日久經文麟督

率兵勇實力攻勦力保危城洵堪嘉尙此股賊匪經官軍截剿獲

勝後曾否他竄前據常順等奏探得哈密賊蹤有西竄吐魯番之

信是否分股西擾抑係探報不確卽著文麟明春據實奏聞文麟

等務當激勵兵勇嚴密探防遇賊卽擊毋稍疏懈明春究於何日

馳赴哈密該處地方緊要兵力甚單左宗棠究派何隊馳援肅州

踞賊經官軍圍剿窮蹙萬一以出關爲走險之路則巴哈兩城適

當其衝受害不可勝言著左宗棠督飭各軍迅圖攻拔務將賊匪

就地殲除毋任逃竄出關致貽大患應如何派兵截剿堵賊出關之處著該大臣妥爲籌畫不得稍涉疏虞一面飭令派援哈密之軍星夜趲行前往以厚兵力金順何日拔隊何以日久未據奏報起程仍著懍遵疊諭帶隊迅速西進科布多屬突有賊匪竄擾軍臺將景廉軍營押解軍裝餉銀十八駄全行掠去托倫布等見派官兵馳往探剿卽著飭令該官兵確切偵探認真防剿並著常順多布沁扎木楚文奎一體嚴防以顧臺路景廉以古城一帶採糧尙易請將口北歸綏兩道運糧全行停止以節糜費刻下金順帶兵出關前經疊諭左宗棠將該軍糧運妥爲籌畫卽著該大臣擇地設立糧臺由關內源源運解以裕兵食察哈爾所省運費米價著額勒和布奎昌毋庸撥解以節經費將此由六百里各諭令知之○以哈密固守城垣擊賊獲勝辦事大臣文麟得旨嘉獎賞副

都統銜○壬辰諭軍機大臣等托倫布保英奏分撥隊伍馳剿竄匪安插臺站並撥赴榮全軍營察哈爾馬隊請暫畱援剿各摺片賊匪由察漢通古臺站竄擾土爾扈特一帶向西奔竄察漢通古迤南哈布塔克卡倫復有匪股麇聚西南兩路臺站聞風逃避見經托倫布等派撥黑龍江官兵二百名由保英帶赴布拉噶河跟蹤截剿安置臺路卽著保英分厯各臺遇賊卽擊將臺站妥爲布置並著景廉英廉一體設法整頓以期疏通餉路毋令壅滯托倫布務當嚴飭馬步各隊密布城防力遏竄匪不得稍涉鬆懈達布蘇圖迤南博東齊河地方有賊匪數百名盤踞該處兵力甚單見赴榮全軍營之察哈爾馬隊二百五十名抵科因西路臺站梗塞未能前進托倫布等所請畱科策應之處著暫准其截畱協同派出各員弁聯絡防剿一俟臺路疏通仍卽迅飭前赴榮全軍營毋

稍延誤將此由六百里各諭令知之○甲午諭內閣前據左都御史胡家玉奏復陳江西省錢糧違例加徵請飭裁革當交戶部妥議具奏茲據劉坤一奏稱胡家玉原奏諸多失實該左都御史及其弟姪有田六七百畝自咸豐初年至今二十餘年銀米絲毫未完該撫接胡家玉干預原籍諸事之信不一而足前於丁漕新章奏奉諭旨之後復貽書該撫等意存恫喝等語除江西徵收丁漕章程業經戶部議奏降旨准行外劉坤一所陳各節著胡家玉明白回奏○丁酉諭內閣前據劉坤一奏稱左都御史胡家玉陳奏江西加徵錢糧語多失實並謂胡家玉及其弟姪田畝久未完糧兼有干預公事信函當令胡家玉明白回奏茲據奏稱本籍祖遺湖田四五百畝其父兄弟五人各分田不及百畝歷年未完銀米均因災歉緩徵劉坤一間或貽書詢問地方公事亦曾函答此次

丁漕改章適江西藩司有書前來據實答復並函致劉坤一實非
意存恫喝等語該撫此次所奏藉詞固多激切惟胡家玉致書本
籍地方官雖爲公事起見殊屬不合著交部照例議處所稱地畝
被淹緩徵是否屬實歷次往來信件是否該撫先行致函均著劉
坤一據實具奏○戊戌諭軍機大臣等前據總理各國事務衙門
奏川省黔江縣民人毆斃法國司鐸教士請飭查辦當諭令魁玉
等將此案詳細實情先行具奏並將案內正兇及從犯嚴緝務獲
訊明懲辦茲據魁玉等奏稱法國主教范若瑟遣教士張紫蘭潛
赴黔江縣私買民房建堂傳教該縣民人將司鐸余克林教士戴
明卿毆斃與總理各國事務衙門前奏情形大略相同見已拏獲
正兇陳淙發等六名飭令西陽州知州羅亨奎等提犯研究下手
正兇稟候查辦餘犯仍飭嚴緝並飭涪州知州濮文昇前赴黔江

會同覆行相驗等語此案究竟因何起釁該將軍等並未敘明如謂買房建堂以致民教不和滋生事端該地方官事前豈毫無見聞已獲之陳淙發等六人是否實係下手正兇亦應確切根究不得遷就了事桂衡亭辦理不善咎無可辭著卽行摘去頂帶撤任仍著魁玉吳棠懌遵前旨將起釁實情迅速查明具奏並嚴究下手正兇躡緝幫毆從犯訊明分別懲辦毋得一味拖延任令該地方官含糊了事並將見在辦理情形隨時咨明總理各國事務衙門毋稍延緩將此由五百里各諭令知之○己亥以克復甘肅肅州關內肅清 上詣鍾粹宮 慈安端裕康慶皇太后前長春宮 慈禧端佑康頤皇太后前賀捷○左宗棠奏 臣宗棠八月十二日馳抵肅州駐營城南二里許十三日巡閱長壕察看各軍綦布星羅鎖圍密合其西北及南門外稍有單薄處所旋飭隨帶鎮西

副中兩營分撥駐紮諸統將均擬乘勢攻拔迅蕝斯役臣等商各將領約期會攻時臣金順已於東北角開掘地道準備至期舉發擬商宋慶合攻東北臣宗棠飭徐占彪降補參將楊世俊各挑壯士於城西南角開花礮轟塌處所填塞賊濠以便騰塌而上一面派隊嚴扼長濠防其衝突首逆馬四卽馬文祿在城上見臣宗棠整旆遙臨惶懼殊甚十四日遣人賁稟赴徐占彪所部歸化營乞撫請出關討賊贖罪臣等覺其詐不與批答惟出示城中曉諭回民老幼婦女免死其誠心乞撫者准詣營投審聽候分別辦理馬四奉到告示匿不張貼十五夜三鼓徐占彪楊世俊督隊填濠城上槍礮連聲不絕副將賴長等連用後膛礮指轟斃賊不少五鼓填濠登城楊世俊揮隊猛撲甫及城腰賊乘高死抗槍子石塊紛集如雨官軍未能驟登十六日黎明東北角地雷轟發宋慶所部

營官遊擊張林急揮壯士冒槍石登城賊負嵎死關張林身中數槍裹創血戰旋中子殞命十七日徐占彪楊世俊於西南城根各掘地道副將賴長守備陳文英李思經以後膛礮向賊叢連轟臣金順宋慶等以劈山洋礮對東北城環擊臣宗棠令副將鄧增移大礮一尊置東北角礮臺晝夜指轟各斃賊無算十九日五鼓徐楊兩軍地道掘成同時舉發楊世俊率奇捷各營壯士奮勇先登副將歐陽吉星率副中營繼之連撲數次斃賊甚多逆眾於城上斜掘深坎伏踞其中坎上密排叉槍伺官軍上城連環施放官軍稍却楊世俊憤甚持刀督戰甫上城頭忽飛子貫腦將士扶救回營次日而殞徐占彪見楊世俊創甚仍督壯士分隊猛撲復陣亡二十餘名帶礮石傷者五百餘名臣等商議賊贖孤城援絕糧乏自無不滅之理仰攻徒損精銳不如增修濠壘仍一面用後膛開

花大礮向城中測準轟擊一面加掘地道困之時劉錦棠報由西甯取道永安赴甘州候調臣宗棠令帶數營前來助剿以所部撫定之河湟番回本賊舊黨可以用奇也九月十四日臣金順派所部壯士從東北城缺口搶登城頭紮卡斷賊由城上往來之路悍賊連日猛撲均經大礮洋槍擊退斃賊甚多其西南各城土回老弱紛紛乞命臣宗棠逐一提訊據稱城中糧盡悍賊宰驢馬充飢老弱乞其皮煮食度活餓斃者不知其數聞官軍不殺老幼婦女故偷出逃生也比設局臨水地方畱養聽候安插初十日劉錦棠率湘軍五營及已撫回番至肅臣宗棠令其駐營南門陝回軍功崔偉禹中海畢大才甘回軍功法鏡泉馬福壽等日馳馬城下呼馬四及各賊目告以死期已至善自爲謀馬四自知生路已絕哀懇出城乞撫十五日親詣臣宗棠大營泥首乞命適臣金順與宋

慶徐占彪劉錦棠均在坐臣等當以罪在不赦仍宜遵前諭先檄馬械次造客土各回戶口清冊聽候審辦安插並令將各悍目分班帶赴大營聽候面諭馬四唯唯聽命嗣是陸續款營呈繳叉槍一千一百七十餘件劈山礮過山鳥槍狗頭礮擡槍數百件矛桿千餘刀叉無數惟戰馬僅繳七十餘匹據稱連日飢甚已將餓瘦之馬悉數宰食所贖止此臣等飭客回分繳冊籍籍甘州者出東門由宋慶點驗籍口外沙州者由臣金順點驗籍西甯河州循化及陝西者由南門出歸劉錦棠徐占彪點驗各軍豫於附近廢堡分男女安置二十一夜土回頭目金自明領賊數十潛由大北門竄出臣金順督隊轟擊殲之金自明伏誅二十二日點驗畢覈對冊籍人數有多復拔出漢民男婦一千一百餘名口二十三日申刻臣宗棠令提逆首馬四卽馬文祿馬永福馬照馬金龍馬良臣

卽禿鄉約王得勝卽王大漢馬金才卽貴德老四馬良臣尢阿渾
等九犯數其罪磔之中軍號礮三響臣金順宋慶徐占彪劉錦棠
立將各起兇悍客回一千五百七十三犯悉數駢誅是夜諸軍入
城縱火槍礮矛刺計土回五千四百餘名除拔出老弱婦女九百
餘名口外盡付焚如肅州以平二十四日安肅道史念祖署肅州
知州李宗笏入城圍脉屍骸枕藉卽老弱婦女亦頗不免蓋昏夜
亂刃交加有不及辨者矣計逆回竊踞州城於今十載始則土回
肇衅繼則馬文祿藍吉楨受首逆安得璘僞封元帥兇燄更張吉
楨死馬文祿以西甯獵戶糾眾撒拉回番及西甯河州劇盜偷息
於此以通關內外花門消息西路安逆中路馬桂源馬本源東路
馬化澂皆資其聯絡中間就撫受職更名馬忠良實則自稱馬文
祿人仍呼之馬四而已當就撫時城內漢民尙三萬餘名口該首

逆殘殺其精壯虜辱其婦女至今僅存老羸男婦千一百餘口其客回從逆者關外則沙州哈密纏頭紅廟子各種關內則西甯河州循化保安營隴西狄道伏羌甘州各種及陝西流徙之回約共兩萬有奇能戰者半之漢民日微回黨日聚勢不至淪爲異域不止自前年徐占彪一軍進剿由甘州高臺轉戰而來大小數十戰偪賊迸聚一城臣金順繼至而圍始合宋慶繼至而圍始密東關既破儲積空矣關外賊走外援絕矣猶敢倔强一隅誓決死鬪是其命中之技堅悍之性誠有異於他賊者茲幸天網高張俾積年逋誅悍賊按籍而誅屠豕刳羊無一漏逸在事諸軍功績卓著合無仰懇 天恩優加甄敘又奏欽奉 上諭金順前有帶兵西進之請著懍遵疊次諭旨趨程前往並先撥得力官兵星馳前進等因欽此 臣聞命之下惶悚實深關外軍情緊迫金順一軍整理需

時臣自當遴派勁旅出關以資臂助惟肅州甫經克復各軍勞乏過甚損折亦多亟須整理見在正擬酌量汰撤稍節虛糜若於各營中零星抽撥湊合成營則兵將兩不相習恐難驟收實效惟駐紮鎮番廣東陸路提督張曜所部嵩武一軍步隊十二營馬隊兩營整理年餘蓄銳已久張曜素嫻韜略曾蒙聖明洞鑒及之且與金順共事數年彼此相習臣前路過涼郡面商關外增軍一事張曜毅然請行臣深佩慰此時金順所定出關二十營整理既需時日臣若僅派數營先往誠恐兵力仍單此不得不調嵩武全軍之實情也惟所部馬隊僅止兩營仍應添派得力之營以期得力查穆圖善續調之吉林黑龍江馬隊頗有堪資挑撥者臣竊見涼州副都統額爾慶額勇幹有爲由管帶吉江馬隊著績簡放是職金順亦稔知其人堪以派往應請旨飭下張曜額爾慶額各帶所

部出關共收實效臣一面先籌兩軍糧運俾資裹帶毋誤師期如蒙俞允張曜額爾慶額應請飭幫辦金順軍務俾盡其贊畫之長庶期共濟近據玉門安西州商民傳言哈密解嚴賊復西遁未知確否然增軍出關則仍未敢視爲緩圖也至欽奉諭旨飭於玉門安設轉運糧臺一節竊爲用兵必設糧臺總司收發支應各處皆然從前西北用兵欽派重臣駐肅辦理糧臺厯有成案臣調督陝甘時因餉需不濟祇於湖北設後路糧臺陝西設西征糧臺專司各省協餉而一切軍需支應製造轉運諸務皆節節設局經理不敢多設糧臺愚陋之見實因糧臺一設所需差委員弁及製造軍需匠作夫役護臺將弁兵勇辦公薪糧等項需費浩繁當茲艱鉅之秋自應力求搏節惟恐局勢日侈需用日多不如設局之結算較便稽覈易施也究之頭緒紛繁事無巨細均須躬親裁決於庶

務時有叢脞之虞而報銷亦難以速辦茲蒙諭設立轉運糧臺實
關外亟應興辦之事亦微臣早擬陳請者可否仰懇 天恩於戶
部堂官內簡任賢能總司其事並令選派廉幹司員攜帶帑銀出
關辦理以昭慎重之處出自 聖裁又奏官軍自閏六月十一至
二十七日圍攻肅城踞逆偪城築壘併力攻勦及臣親赴前敵商
酌機宜籌辦糧運各情形業於七月十八日詳悉陳明七月初一
日據逃出難民供稱賊因東關已被官軍攻克長圍愈緊勢尤危
迫各逆目造長車數十架每架長二丈四尺寬一丈五尺上安擋
牌毡片以禦槍礮下用軸轆以數十人共推一架意圖架濠而過
徐占彪傳諭各營豫爲部署初六日五鼓大南門果出悍賊四五
千均推擋牌長車分爲三股一撲歸化營新築營卡一撲新左營
長濠一撲右營長濠並拔濠外木椿蠶擁搭濠徐占彪令各營以

洋礮劈山礮憑濠環擊轟毀攔牌斃賊頗多扒濠之賊爲守濠隊
伍刀砍矛刺紛紛倒仆維時歸化營營卡之賊亦經該營擊退參
將楊世俊率所部奇捷營急由西南角馳至合提督陶生林副將
桂錫楨參將馮桂增方友升遊擊秦玉盛武朝聘等馬步各營及
安肅道護勇齊隊越濠奮威追殺副將鄧增賴長以後膛大礮連
放三十餘響擊斃尤眾傷者不可勝計各軍奪獲牌車四十餘架
賊卽敗遁時金軍於東北角用開花礮對城轟攻宋軍排列東南
長濠槍礮環施賊仍向南門敗竄回城復由城中馳赴東北與金
軍拚鬪金軍仍以槍礮指擊斃賊無數據擒賊供稱賊目馬四傳
諭黨眾乘蜀軍統領傷尙未愈突圍狂竄此次城賊攔帶牌車鑪
擁出撲兇餒仍熾蓋自知處於必死之地故鬪志益決不虞仍爲
官軍所敗志不得逞也十八日徐占彪以楊世俊所紮城西南之

苦水堡地勢較高商令修築礮臺攻西南兩面十九日三鼓賊大股由北門繞出城西北急思乘夜竄遁前隊賊千餘名直撲元亨新中三營濠壘各營槍礮齊施斃賊多名徐占彪復調先鋒親兵營及方友升馮桂增等馬隊應援賊見兵力愈厚長濠扼守甚嚴仍退縮入城二十三日西南城角之苦水堡礮臺築成高與城齊寬能排置大礮二尊臺側有水溝二道便於設伏溝西南土塬層疊而塬畔距城根僅十餘丈溝南塬中又有破牆溝西塬直接禮拜寺官軍營壘二十五夜徐占彪派新後營副將康得勝撥隊南塬就破牆紮卡副營總兵宋賢聲於西塬塬邊築卡總兵李玉春率先鋒親兵營列隊護之元亨正新左新中右捷中左等營幫修卡濠賊見官軍逼城添築卡壘城上槍礮施放益緊鄧增賴長以後膛大礮指轟始退縮城下兩卡均連夜築成二十六夜徐占彪

令元亨副新中四營楊世俊所部捷中左兩營由西塬開挖深溝一道橫連禮拜寺正右新左營由南塬挖溝橫通礮臺側之水溝口仍派李玉春率先鋒親兵營於前面列隊以護每營分挖三十餘丈深約五尺寬六七尺連夜竣工晝以步隊十營各挑壯士暗伏溝內待後膛礮轟塌城身乘機進取夜則飭派馬隊改步伏之抽步隊回營守濠是夜槍礮如雨鄧增賴長以後膛礮連轟乃息時城西復出賊三四百名蠡擁來撲先鋒營擊卻之二十七夜徐占彪以水溝口礮臺距城較近令先鋒營於溝南紮卡商派楊世俊紮卡溝西互爲犄角飭鄧增賴長陳文英日用頭二號後膛大礮測準轟攻計西南城角轟塌七十餘垛口城身外面甃石亦多塌卸八月十二日臣馳抵肅州駐軍城南二里許會督各軍晝夜攻剿所有八月十二以後戰事及此次克復城池各情形另摺具

奏以清眉目 上諭軍機大臣等肅州逆匪經左宗棠與金順分督各軍會合圍攻並各掘地道進擊逆首馬四以勢蹙詣營乞撫經左宗棠等飭令呈繳馬械點驗冊籍九月二十三日該大臣將逆首及各起兇悍客回悉數誅戮卽於是夜克復肅城覽奏實深欣慰所有肅城善後及甘省一切事宜應如何次第興辦撫輯地方以資培養之處著該大臣通盤籌畫妥爲布置前因關外軍情緊迫疊諭金順統率所部出關左宗棠揀派得力將弁前往助剿茲據該大臣奏稱提督張曜夙嫻韜略副都統額爾慶額勇幹有爲均堪派令出關會同勦辦卽著知會張曜統帶嵩武全軍額爾慶額統帶吉林黑龍江馬隊會同金順馳往關外迅掃賊氛金順一軍勞乏過甚自應略加整理仍著該前將軍趕緊部署卽率得勝之師早日西進不可過於延緩左宗棠務將各軍糧運妥爲籌

備俾利師行安設轉運糧臺一節該大臣請於戶部堂官內揀員總司其事並令選派廉幹司員攜帶帑銀出關辦理著候旨遵行惟糧運事宜必須地方大吏督率呼應方靈即使派員前往仍須該大臣會同籌辦方能有濟也袁保恆著賞假三箇月俾令回籍省視所有西征糧臺事宜著左宗棠知照袁保恆將見辦事宜趕辦完竣並遴派妥員暫行接管袁保恆一俟假滿卽行赴陝經理毋稍遲延將此由六百里各諭令知之○左宗棠奏肅城土客逆回業已辦結其老弱婦女二千數百名概行遞解蘭州設局畱養俟臣宗棠凱旋擇地方分起安插以廣皇仁惟客回種類不一其由哈密遷來之纏頭回子一種見止二百八名據稱係康熙年間來肅近爲肅逆迫脅死傷甚多哀懇於內地安插其沙州紅廟子一帶回族則地方尙未肅清更無遣歸之理且人數所贖無多

婦女老弱居其大半臣等已飭一同解赴蘭州再候安插見在肅州實無一回羈雜其甘州涼州各回死亡殆盡亦無遺種從此關內外花門句結當可無虞特自古徙戎之舉均係自內及外無由遴選腹之例局外議論非所敢知然熟察情實非此不能杜輿而靖邊疆報聞○以克復肅州賞提督徐占彪雲騎尉世職蔣東才陳春萬黃馬桂餘升敘有差○開復甘肅陣亡降補提督楊世俊原官與提督王子龍等均予祭葬世職○庚子諭內閣昨因肅州克復降旨將在事出力之徐占彪等分別優獎因思陝甘逆回擾亂十有餘載勢極猖獗自節任左宗棠總督陝甘數年以來不辭艱苦次第勦除此次親臨前敵督飭將士克復堅城關內一律肅清朕心實深嘉悅自應特沛殊恩用昭懋賞左宗棠著以陝甘總督協辦大學士該大臣前經賞給騎都尉世職並著改爲一等輕

車都尉世職將軍金順督軍助勦共奏膚功洵爲奮勉著開復革職處分○諭軍機大臣等據左宗棠奏餉項奇絀請撥四成洋稅以資接濟當經降旨交戶部速議具奏第思甘肅地方瘠苦見又時屆隆冬該將士荷戈關隘寒冽異常朕心深爲軫念本日已諭知戶部於庫存項下撥銀一百萬兩陸續解往左宗棠於此項銀兩解到後卽可酌放月餉俾資飽騰至該大臣軍營餉需亦諄諭戶部嗣後務撥有著之款不得以空言搪塞該大臣所請揀派戶部堂官辦理糧臺事宜自爲慎重起見但轉運採買非得地方大吏辦理則呼應不靈該大臣素顧大局朕所倚畀不必再派部院大員以期事權歸一此次攻拔肅城窮蹙之寇幸皆聚而殲旃關外安敦玉等處有無匪徒竄匿哈密曾否解嚴迄今未據文麟奏報關內如甘涼平番一帶有無零星餘匪西甯河州撫事諒不至

再有反覆甘境甫經戡定
臣所部各營官兵數年來
息一面設法裁併庶一兵

有兵勇擇要分紮以資鎮撫該大
馳驅勞苦已久自應一面量加休
一兵之用而餉亦不至虛糜至將

來關外用兵籌餉難籌糧尤屬不易應如何先事豫籌該大臣諒
早計及著將兵事餉事統籌全局悉心經理與關內外見在地方
情形一併詳細奏聞張曜額爾慶額馬步各隊何時可以出關金
順昨亦諭令將兵勇略加休憩卽率得勝之師西進所有出關官
兵糧餉轉輸及採買一切事宜該大臣自無不引爲己任不待朕
之諄諄訓諭也將此由六百里諭令知之○辛丑飭催各省迅解
京餉○甲辰諭內閣前據左宗棠奏肅州克復關內一律肅清先
後降旨將左宗棠等及在事出力各員優加獎勵因思該省各路
統兵大員或扼要設防或相機雕剿同心協力共奏膚功允宜一

體施恩以彰勞勩將軍金順助攻肅州已加恩開復革職處分著再賞還黃馬褂花翎清字勇號以示鼓勵穆圖善前署陝甘總督統兵勦賊懋著勤勞此次移紮涇州扼賊紛竄亦屬得力著賞給雲騎尉世職提督宋慶駐軍陝西邊境屢挫賊氛迨調赴甘肅合攻肅州尤爲奮勇張曜扼紮甘肅甯夏郡城勦辦王家疃等處踞匪地方得以安謐近由涼州馳赴肅州勇往可嘉宋慶張曜均著賞戴雙眼花翎副都統銜西甯辦事大臣豫師會同左宗棠辦理西甯招撫事宜復在平番防勦得力著賞給頭品頂帶其辦理西征糧臺之二品頂戴詹事府詹事袁保恆籌解軍餉始終無誤亦著賞給頭品頂戴見在關內肅清亟應乘此以成將關外各處竄匪次第掃除著金順督率所部迅赴古城會同景廉進勦穆圖善著卽派隊赴安西敦煌玉門一帶扼紮妥籌防勦以壯聲援哈密

尙未解圍張曜著與宋慶統帶所部一同馳往哈密與文麟明春
會同剿賊以厚兵力該將軍等務當奮迅圖功殄除醜類用副委
任所有出關各軍轉運糧餉關係緊要著左宗棠認真督辦源源
接濟毋任缺乏○諭軍機大臣等前於九月二十七日寄諭李鴻
章詢問明春恭謁西陵橋梁道路各事宜能否先期趕辦迄今
日久未據該督覆奏即著體察情形迅速據實奏聞毋再遲緩將
此諭令知之○諭前因肅州克復加恩以左宗棠協辦大學士並
賞給一等輕車都尉世職本日復明降諭旨穆圖善等分別加恩
獎敘以示論功行賞用彰勞勩見在關內肅清隴右大兵雲集自
應乘此聲威分路西征景廉駐紮古城兵力單薄亟應添派勁旅
以圖進取金順所部尙有二十營若與景廉合在一處則兵威較
壯景廉本有請飭金順前赴古城之奏即著統率各營剋日馳赴

古城相機進剿以期規復烏魯木齊景廉於金順到後將各隊如何分撥前進之處卽著和衷商辦不得稍涉意見其額爾慶額馬隊卽著左宗棠飭令隨同金順西進聽候調遣哈密雖獲勝仗見在是否解圍未據文麟等續報張曜宋慶所部兵力較厚該提督等久歷戎行辦事奮勇朕所素知著卽督率所部馳往哈密駐紮會同文麟明春等相機防剿遇有軍情緩急均准會銜奏事穆圖善所部馬步各隊久駐涇州徒置無用之地卽著飭令該統領等分起前赴安敦玉一帶駐紮以爲諸軍後繼該將軍見在奏請陛見著將各隊分派起程後再行來見面授機宜以上各軍經朕酌量分派後該將軍等接奉此旨卽行奮迅前進不得託詞耽延儻有玩泄從事朕必當按律懲辦決不寬貸至各該軍馳赴關外糧餉一切及轉運事宜責任綦重必須先事豫籌並著飭地方官悉

心經理帶兵大員其勢難於兼顧左宗棠身任兼圻責無旁貸著
卽統籌各軍所需糧餉軍火等項每月應用若干寬爲豫備陸續
轉輸毋令稍有缺乏如果各該軍逗畱不進則罪在主將儻因糧
餉不繼致誤戎機朕惟左宗棠是問關外情形究竟若何糧運道
路若何鎮迪以東俱總督統轄之地著卽詳細查明繪圖呈覽河
州狄道回情是否安帖該大臣督辦糧運自應駐紮肅州蘭州省
城止有藩臬駐紮是否足恃西甯安插各回眾能否不滋事端並
著左宗棠豫師據實具奏左宗棠所部各隊久在邊陲其中疲乏
者諒亦不少自應分別遣撤將得力之師分紮各要害以資彈壓
值此餉項支絀之時尤宜汰弱畱強以節糜費將此由六百里諭
知左宗棠穆圖善金順景廉豫師文麟明春並傳諭張曜宋慶知
之○是月蠲緩直隸灤州等六十五州縣被水被雹新舊額賦暨

倉穀雜課有差

十一月戊申冬至祀 天於圓丘○諭軍機大臣等常順等奏賊

匪分股竄擾見擬督隊迎剿一摺賊匪竄擾車臣淖爾一帶分股在察幹河及莫爾根霍碩等處滋事常順等見飭達密蘭等帶隊馳往截剿卽著飭令該官兵遇賊卽擊毋稍疏懈蒙古臺站關緊西北各城糧餉轉運賊蹤飄忽靡常見已竄擾圖謝公遊牧深恐賊股四竄於臺路殊有關礙常順業經馳赴前敵督隊迎擊卽著督率各軍迅將此股賊匪悉數殲除毋任蔓延爲患並著多布沁扎木楚文奎會同托倫布保英勤加偵探實力剿擊以期淨掃逆氛而疏臺路將此由五百里各諭令知之○庚戌諭軍機大臣等榮全奏馳報前敵近日情形舊疾未痊請簡大員接替常順等奏迎剿竄匪獲勝各摺纏夷滋擾新渠城堡一帶經景廉派營總依

爾和布帶隊援勦會合國勇疊獲勝仗惟前據景廉奏該都統因
古城兵力尙單已將依爾和布一軍撤回刻下新渠等處止有徐
學功營勇分紮難資捍禦榮全務當飭令官兵確探賊蹤妥籌防
範並與國勇聯絡策應以壯聲援該署將軍以東路軍情喫緊請
飭金順迅速出關見在肅州克復關內肅清業經諭令金順張曜
宋慶部署出關分赴古城哈密等處會同景廉文麟等防勦諒該
將軍等接奉前旨定當振旅西行不至稽遲時日也榮全舊疾未
痊殊深慮念西路軍事孔棘該署將軍仍當力疾籌辦維持大局
以副委任毋庸開缺賊匪竄擾車臣淖爾及圖謝公游牧常順親
赴前敵督勦十月初間卓凌阿帶兵接仗獲勝該逆向西北逃逸
著常順等督飭官軍確切偵探覘賊所向奮力勦擊務將賊股迅
速殄除毋任滋蔓該匪股數眾多來往飄忽榮全旣據科城咨稱

有賊二千餘人欲竄科布多等處卽著托倫布保英妥籌剿辦力
掃逆氛並將匪蹤究竄何處確探具奏哈密已否解圍未獲文麟
等續報卽著該辦事大臣等將該城近日情形詳悉奏聞以慰厯
繫將此由六百里各諭令知之○飭山東等省迅解新疆欠餉○
辛亥予甘肅守城禦賊故在籍同知祁兌建祠○壬子諭軍機大
臣等王文韶奏貴州生苗糾眾襲寨戕官見經收復一摺貴州丹
江廳屬之蓮花開開屯奸苗暗約八寨古州苗眾勾結散勇滋事
襲破雞講寨署通判屠翰合門被害官兵亦有傷亡經王文韶飭
令提督龔繼昌等分隊進攻斃賊多名當將雞講收復賊匪向皆
各喬桑烏洛遁去黔省甫就肅清古州上下江等處生苗膽敢勾
眾襲寨戕官亟應及早剪除以清萌蘖著王文韶曾璧光各飭在
防官兵勤加偵探認真防剿將逸賊悉數殲除毋貽後患並隨時

相機鎮撫消禍未萌黔省軍務初平瘡痍未復全賴地方官潔己奉公安良除暴庶幾與民休息治理日臻著曾璧光慎選賢能牧令切實講求吏治該省地方官吏如有不勝任者嚴行糾參毋得稍涉姑息以靖地方將此由四百里各諭令知之○甲寅諭軍機大臣等金順奏統師出關憑陳需餉實數籌畫糧運請飭撥兵勇皮衣銀兩帳房軍火仍令陝西製辦各摺片金順見率所部馳赴古城一帶勦賊士卒荷戈邊外艱苦倍常且戈壁長途糧運一切需費甚鉅亟應籌撥有著之款如期解濟俾赴戎機所請於粵海關江海關江漢關洋稅項下按月添撥三萬兩之處著戶部速議具奏其四川新添該將軍營餉銀每月一萬兩著吳棠飭令藩司剋期埽數撥解毋稍遲誤哈密雖據探報解圍該逆西竄吐魯番一帶金順仍應趕緊部署出關率得勝之師轉戰而前痛殲醜類

並遵十月二十九日諭旨速赴古城與景廉會商防剿規復烏魯木齊以慰厯繫關外用兵糧餉軍火最爲緊要前經諭令左宗棠妥籌辦理該大臣自必通籌全局源源接濟毋任缺乏金順所部及接統成祿舊部兵勇統需皮衣銀二萬六千兩著戶部卽行如數指撥解至歸綏道衙門發給該營委員以資應用金順軍營所需帳房軍火厯年均由陝西製辦仍著邵亨豫照舊章籌款辦理見在秦隴肅清晉省防務已鬆該省防軍應如何分別撤留以節餉需著鮑源深悉心酌度奏明辦理將此由六百里各諭令知之○諭托倫布等奏剿捕逆匪疊獲勝仗一摺賊匪竄擾科屬博東齊地方經保英帶兵往剿並著喜莫得等分投進攻該逆紛紛逃竄十月初八日在阿育爾公喇嘛庫倫等處接仗殲斃賊匪數百名餘匪向翰克扎薩克迪南逃竄並探聞西路盤踞慶格里之賊

復欲乘機蠢動亟應迅籌勦辦以遏賊氛著保英統率派出各軍
痛加勦洗毋任紛竄並著景廉派撥隊伍前往合力殲除以清餘
孽托倫布當就見有兵力妥籌防勦力顧城防本日據金順奏探
聞哈密業已解嚴惟尙未據文麟奏報見在究竟已否解圍著文
麟迅速奏聞並著該辦事大臣等將該城防守事宜悉心籌畫不
得稍涉疏虞將此由五百里各諭令知之○乙卯諭內閣朕於明
年二月二十四日恭奉 慈安端裕康慶皇太后 慈禧端佑康

頤皇太后啟鑾二十七日祇謁 西陵禮成後於三月初二日還
宮所有應行事宜著各該衙門照例敬謹豫備○丙辰命盛京工
部侍郎奕慶留京當差調戶部右侍郎桂清爲盛京工部侍郎○
丁巳 上詣 大高殿祈雪並詣 時應宮 昭顯廟 福佑寺

拈香○戊午 上以祈雪詣 宣仁廟 凝和廟 普度寺拈香

○己未諭軍機大臣等禮部奏越南使臣齎到該國王奏疏鈔錄呈覽一摺據該國王奏稱河陽興化諸匪巢獨力攻剿顧此失彼山興宣三轄蔓匪仍復猖獗請飭派兵會剿等語越南國邊地被匪竄擾前經諭令馮子材督飭官軍出關剿辦嗣以兵勇不宜久駐外國且慮有騷擾情事是以疊准劉長佑等奏將各營陸續撤回茲據該國王具疏籲請朕睠顧藩封殊深軫念此時粵西官軍如令出境剿匪究於該國有無裨益且不至別滋事端之處著劉長佑馮子材悉心妥籌迅速具奏並著禮部傳令該國王知悉該國王原奏著鈔給劉長佑馮子材閱看將此諭知禮部並由五百里諭令劉長佑馮子材知之○以崇綺爲戶部右侍郎由內閣學士遷○飭粵海等關撥銀六萬兩濟金順軍餉○辛酉諭軍機大臣等劉長佑奏越南各匪肆擾見飭粵軍防剿並籌保衛邊境一摺越南

各匪在宣光河陽一帶分股擄劫據報法國帶兵攻破越南河內
省城官多被擄兵有傷亡並有黃逆崇英與陳四黎大各匪乘機
攻襲太原山西奸民游勇蟻附鴟張之信北甯見亦戒嚴刻下越
南各匪乘機肆擾深恐該逆假冒外國名色或勾結爲患必致又
起釁端粵西太鎮南甯三府均與粵南毗連該處止有劉玉成覃
遠璉兩軍兵力甚形單薄見越南夷官踵營求救自應相機防剿
以顧外藩著瑞麟張兆棟迅卽撥兵數千名由欽州徑出關外約
會援剿或繞赴西省南太地方協同堵擊並著劉長佑飭令劉玉
成等軍酌度情形認真剿辦仍著瑞麟等查照前次奏撥之案按
月籌解餉銀二萬兩以資接濟粵軍於邊關內外堵剿越南各匪
與法兵絕不相涉著總理各國事務衙門卽行照會法國使臣轉
飭遵照毋令別滋事端將此由四百里各諭令知之○壬戌諭軍

機大臣等景廉奏援軍抵哈擊賊獲勝立解城圍並探聞餉銀被劫各摺片景廉所派之吉爾洪額等軍於八月間到哈在泥基頭地方與賊接仗獲勝復會同威儀營官軍將回城收復並攻破南湖賊營辦理尙屬得手惟據探白彥虎股匪由五堡分股奔竄並有撲犯古城之信亟應迅速截剿以遏賊氛卽著景廉飭令吉爾洪額等拔隊回古以資防剿並飭派出各營奮力殲除毋任紛竄據奏該逆將福晉回王縛送南湖賊營該福晉等被賊偏脅不從實屬深明大義刻下南湖業經攻破該福晉等見在何處著文麟等將實在下落確切查明妥爲安撫景廉餉銀在科布多所屬察漢通古臺被賊搶劫卽著咨明托倫布等派員一體詳查哈密解圍疊據各路奏報文麟何以日久尙未據奏著卽迅速奏聞明春業經到哈著與文麟會商將該城防守事宜悉心籌畫毋稍疏虞

匪蹤飄忽靡常烏里雅蘇台所屬諾木托羅蓋等處已有匪蹤竄擾仍著常順等飭令達密蘭確切偵探妥籌防剿迅埽逆氛所有此次剿匪出力人員及陣亡兵勇著景廉查明分別奏請獎卹將此由六百里各諭令知之○諭常順奏烏城戰守兵數相等城防布置周妥情形一摺據稱文奎等請催察哈爾官兵摺內隱然以該署將軍爲多擁強兵於外而畱孱弱以居守置城防於不顧因將布置情形縷晰上陳等語文奎等前請催調官兵自係爲嚴密設防起見常順率行揣度嘵嘵置辯殊屬非是嗣後該署將軍務當以公事爲重與該參贊等隨時和衷商辦不得稍存意見貽誤事機自干咎戾將此諭令知之○移雲南提標右營遊擊駐蒙化廳鶴麗鎮標右營都司駐麗江府城劍川營都司駐喇雞鳴臨元鎮標左營都司駐臨安府屬曲江驛鶴麗鎮標右營右哨千總駐

劍川州城添設潑江營遊擊守備各一千總把總外委共十六○
甲子 上詣 大高殿祈雪○諭內閣御史吳可讀奏請將已革
提督成祿立正典刑一摺除原議之軍機大臣及刑部堂官毋庸
會議外著御前大臣大學士六部九卿將該御史原摺並軍機大
臣會同刑部定擬一摺再行覈議定擬具奏○予故前任浙江提
督鄭魁士祭葬諡壯烈○己巳諭軍機大臣等岑毓英奏查明滇
省情形擬卽撤勇停捐一摺軍興以來募勇籌捐本係一時權宜
之計軍務平定自應規復舊制免滋弊端滇省已就肅清據該撫
查明所部粵勇除遣散外所餘不過千人其籍隸本省勇丁挑選
精壯充補綠營兵額餘令歸農歸廠自謀生理所奏甚合機宜卽
著會商劉嶽昭督飭得力將領將見在各營勇丁分別遣畱所畱
各勇准其充補兵額仍著該督撫隨時勤加訓練束以營規俾成

勁旅其遣散各勇尤須妥爲安置免致滋生事端至該省及各省所設捐局既可裁撤卽行查明奏聞一律停止以免有名無實滇省變亂日久仕途旣雜吏治宜及時講求該督撫慎選賢能牧令與民休養生息遇有庸劣各員亟應隨時甄別毋任濫竽厯年收捐款項卽著該督撫查明實數應如何加廣學額中額之處請旨辦理另片奏吏治營伍國用各節深明大計卽著照所議辦理停捐裁勇滇省能先舉行足見該撫勇於任事著與劉嶽昭和衷商辦實事求是整頓地方用副委任該撫所議各節本日並諭令各省督撫等酌度情形籌議具奏矣將此由四百里各諭令知之○諭岑毓英奏遵旨覆奏侍郎徐桐所陳安危大計請將吏治營伍國用力圖整飭據稱整頓吏治必先停捐欲停捐必先足用欲足用必先易勇爲兵按楚勇章程各省如裁勇十萬每歲所省餉銀

卽足抵補京外捐項見時多以勇營畱防則綠營未能整頓可知應將見在勇丁挑選精壯充補綠營兵額痛除積習易弓箭爲槍礮勤加操練餘勇酌給欠餉妥籌遣散擬請由滇省先行辦理等語所陳不爲無見滇省既可首先舉行各省情形雖不相同亦當力求整頓應如何認真籌畫妥爲布置之處著各省督撫按照該撫所議各情悉心酌度次第經理務使實有成效毋得徒託空言並將擬辦情形先行詳細具奏原片均著鈔給閱看將此各諭令知之○庚午諭喬松年等疏濬運河○壬申諭內閣前據軍機大臣會同刑部審明已革烏魯木齊提督成祿罪名比例擬以斬立決聲明應否改爲斬監候恭候欽定旋因御史吳可讀奏請將成祿立正典刑當令御前大臣大學士六部九卿再行覈議定擬具奏茲據該王大臣等奏稱成祿罪名仍照原議辦理其未經畫稿

之通政使于凌辰大理寺卿王家璧亦據另摺陳明均無異議成
祿著改爲斬監候餘均照軍機大臣等所請辦理至御史職任言
官雖准風聞奏事何得以私意揣測形諸奏章該王大臣等謂吳
可讀刺聽朝政與風聞言事不同請旨究詰實據等語御史吳可
讀著降三級調用毋庸究詰○諭軍機大臣等錫綸奏回賊西竄
軍臺阻梗見擬派兵會勦文奎等奏防勦喫緊請截借軍餉英廉
奏馳回塔城見擬籌辦各節並籌安設布倫托海等臺各摺片賊
匪竄擾科屬察漢通古軍臺等處和碩特土爾扈特等喇嘛營子
均被劫掠賊蹤西竄至青格里河錫綸見派蒙庫吉呼噶爾帶領
蒙兵喇嘛等眾前往烏隴古上游沿河一帶相機堵勦卽著錫綸
飭令該官兵認真探擊毋稍疏虞該處軍臺爲古城塔城要路且
爲榮全景廉等營運道所必經見探聞烏梁海各臺站皆已逃散

亟須力圖勦洗以淨賊氛錫綸派出之軍僅有六百名兵力甚形單薄著托倫布保英卽速派令伯多滾察漢淖爾防兵選擇妥員管帶前進兩路夾擊並派明幹之員隨同官軍一面整飭軍臺以顧運道儻賊氛甚熾卽著錫綸親率所部前往督勦榮全景廉亦當勤加偵探應如何派兵會勦之處卽著妥籌調撥迅赴戎機科屬迪西臺站被擾烏城防勦喫緊儲款無存文奎等請由伊犁軍餉暫行截畱二萬兩以資接濟卽著准其暫行借用一俟烏城軍餉解到卽如數補還該城需餉甚殷那借止可顧一時之急著戶部將各省蒂欠該城之款嚴行催取迅速籌解並咨明綏遠城張家口兩處於烏城軍餉解到時卽飭該城領餉各員迅解到烏以資急用榮全處盼餉亦切嗣後文奎等亦不得任意截畱以致顧此失彼厄魯特官兵寄居布倫托海英廉以塔城一切章程尙無

頭緒擬俟餉項稍充再行飭調回塔卽著照所請行該城見在應
辦事宜亟須斟酌緩急次第舉辦惟從前案卷全行遺失著戶部
兵部工部理藩院將塔城厯辦冊案摘鈔一分並將該部院則例
一並頒發交英廉迅速辦理該城拖欠哈薩克駝馬帳目著英廉
卽令親王扎薩克厄魯特領隊大臣等查明確數具文承領此項
銀兩並准併案覈實報銷塔城布置一切需款甚多著戶部卽行
籌撥銀八萬兩俾資應用英廉請於東路臺站置買駝駝四百隻
騾駝四百隻驢馬六百匹騾馬六百匹分放各臺應差惟此項駝
馬爲數太多塔城無從採買著常順多布沁扎木楚文奎卽派員
按照市價妥爲照數採買務選口輕臚壯母任以疲弱充數卽由
英廉派員赴烏領取所需款項常順等先行墊辦俟戶部撥款解
到卽由常順等照數扣還以清款目布倫托海一臺爲科布多所

轄前此駐紮該處之厄魯特官兵除由錫綸調往外其餘人眾亦應調回塔城卽著托倫布保英速卽撥派官兵前往安設臺站以便厄魯特人眾移回塔城駐紮其餘安設各臺卽著照英廉所擬辦理該參贊大臣務當實心經理以副委任將此由六百里各諭令知之○諭李宗義等籌銀五萬兩解交淮安關監督備傳辦要需○癸酉 上詣 大高殿祈雪○撥山東司庫銀六萬兩備運河工需○甲戌諭軍機大臣等魁玉吳棠奏蠻匪滋事官軍剿撫兼施地方見已靜謐一摺四川峽邊廳境蠻匪蠢動經魁玉等派兵剿捕殲擒悍目數人該蠻眾窮蹙畏懼先後投誠該將軍總督擇其樸誠可靠之人令充千百戶設立夷兵夷約並將建礮修堡等事宜次第舉行辦理尙爲妥協惟裸民支蕃族眾全在地方官撫馭得宜魁玉吳棠務當督飭所屬將善後各事宜妥爲籌辦並

隨時捐循防範以杜亂萌毋稍大意將此由四百里各諭令知之
○是月蠲緩直隸寶坻等三縣歉收額賦並減免差徭江蘇高郵
等三十六州廳縣淮安等九衛被水被旱太倉等三十九州縣蘇
州等五衛被旱暨未墾田畝山東濮州等七十三州縣德州等四
衛並東平所被水被旱被蟲浙江海甯等六十六州縣杭嚴等四
衛被旱被風被雹被蟲新舊額賦雜課緩徵安徽泗州等四十五
州縣被水被旱被風被蟲新舊額賦雜課

十二月乙亥朔諭軍機大臣等都興阿等奏賊匪聚眾械鬪見籌
勦辦情形一摺本年十一月間突有賊首宋幗倡率領匪眾與高
希田械鬪傷斃多人該匪見竄往夾心子高家盤踞難保不竄入
貔口滋擾亟應迅速勦辦著都興阿等督飭派出各隊趕緊緝拏
務將此股賊匪及早撲滅毋任蔓延並著將高希田與宋幗倡起

變根由詳細查明妥籌辦理以靖地方將此由四百里各諭令知之○丁丑以明年恭奉 慈安端裕康慶皇太后 慈禧端佑康

頤皇太后祇謁 西陵詔撥直隸藩庫銀一萬二千兩修治橋道

○庚辰諭內閣邵亨豫奏故員殉難慘烈請賞還世職一招據稱守城殉難之前山東臨清直隸州知州張積功所得雲騎尉世職因其嗣子張紹陵傳教獲罪致停承襲惟該故員前在臨清守城禦賊力竭捐軀全家殉難死事甚烈懇請賞還世職等語張積功所得雲騎尉世職著卽賞還准其於近支內擇人承襲○以松淮爲內閣學士由詹事遷○移浙江黃巖鎮總兵官於海門衛爲海門鎮總兵官改甯海左營守備一千總二把總四外委三隸海門鎮左營轄○壬午雲南巡撫岑毓英奏奉旨兼署督篆自揣兼顧難周請另簡員署理得旨岑毓英向來勇於任事朕所深知雲貴總督

仍著該撫兼署將地方應辦事宜悉心經理毋許固辭○癸未諭
軍機大臣等榮全奏東路竄匪喫緊見籌截剿情形一摺關外竄
匪在青格哩池東各臺焚掠經錫綸帶隊迎剿獲勝賊匪奔竄與
錫綸前奏情形大略相同該匪見已竄入塔境亟應迅速剿辦著
榮全飭令派出各軍分投探剿迅掃逆氛並著英廉督飭塔城官
兵嚴密設防毋得稍涉大意該匪由阿雅爾淖爾向大小拐地方
奔竄該處與瑪納斯路徑相通孝順見已帶隊赴沙灣迎剿即著
榮全飭令該員迅圖剿洗務將此股竄匪悉數殲除免致勾結爲
患錫綸前派隊伍赴烏隴古上游一帶堵擊並著督飭該官兵勤
加偵探認真防剿毋稍疏虞將此由五百里各諭令知之○甲申
諭軍機大臣等錫綸奏陝回分股西擾官兵追剿獲勝英廉奏塔
屬各臺被擾見派員照舊安設托倫布等奏科屬竄匪敗逃整頓

臺站各一摺陝回句結竄哈賊股擾及烏梁海等部落錫綸督率
官軍追至霍博克河下游科科墨頓地方截剿獲勝賊匪乘夜遠
颺錫綸兵力甚單此次連獲勝仗斃匪多名賊眾雖已敗逃究未
大加懲創尤恐與瑪納斯大股句結遂成滋蔓難圖錫綸見已飭
令沙山子各軍由阿雅倫淖爾南畔瑪納斯河東一帶扼要堵截
著卽嚴飭該處兵勇認真截擊毋使賊勢蔓延榮全昨日奏報已
派孝順額爾根巴圖等帶兵分赴沙灣高家磴地方探蹤剿擊著
卽飭令孝順等勤加偵探會同錫綸派出各軍盡殲醜類毋稍疏
虞塔城所屬烏素圖烏圖布拉克鄂布爾圖三臺官兵聞警逃散
英廉見在派員督催照舊安設著參贊大臣卽行文該王扎薩克
等速將被難蒙古妥爲安插並趕將驚散臺站設法安置英廉仍
當會同榮全督飭見有官兵嚴加防守遇賊卽擊以顧臺路科屬

見無賊蹤著托倫布保英刻卽查明各臺被擾情形分別撫恤一面將各臺安設齊備毋得以賊氛已遠稍爲鬆勁將此由五百里各諭令知之○乙酉允李宗義等奏修運河惠濟牐並暫停堰圩石工○丙戌 上詣 大高殿祈雪○丁亥諭軍機大臣等景廉奏西路官軍剿匪獲勝古城防務喫緊請飭金順速進助剿並賊擾軍臺請飭科布多就近剿辦安設臺站各摺片徐學功率領練勇在三道廠子地方截擊竄匪獲勝實屬奮勇可嘉本日已明降諭旨將該員照所請獎勵矣逆首白彥虎等見已竄入瑪納斯並勾結迪屬回匪勢漸鴟張或西撲沙山子或東犯古城均在意中巴里坤屬之紅柳峽等處亦有竄匪滋擾濟木薩迪西三臺地方復有逆回假充兵勇搶掠之事景廉一軍駐紮古城有四面受敵之勢情形殊爲喫緊前經諭令金順帶同額爾慶額督兵出關前

赴古城會同景廉勦匪刻下當已布置就緒卽著該將軍剋日拔隊起程馳往勦辦毋得稍事逗畱貽誤事機其需用車馬並糧運事宜著左宗棠督飭地方官妥速籌辦以利師行景廉見派孔才帶兵赴三臺勦賊著飭令該統領實力勦擊迅殲賊股沙山子爲西路要地儻該處被賊踞擾關係綦重逆首白彥虎既有撲犯沙山子信息官軍白應迅往扼防以杜窺伺景廉已咨會錫綸率隊進紮並請飭榮全令孝順率部會勦孝順見駐沙灣距沙山子不遠卽著榮全檄飭迅速會合錫綸進兵痛殲匪類毋任蔓延兵機旦夕異宜辦理尤貴迅速若待請旨飭行往返稽遲恐致貽誤嗣後景廉於就近各軍如有應行調撥之處卽由該都統調遣以期便捷毋稍拘泥科布多屬軍臺前被賊擾臺兵潰散景廉軍營道路阻隔業據托倫布等奏稱科屬已無賊蹤該署參贊等飭將烏

梁海等處各臺一律安設齊備並查明被難蒙古分別撫恤卽著
托倫布等迅速籌辦以通臺路將此由六百里各諭令知之○戊
子諭內閣禮部議結磨勘處分請旨更正並自行檢舉一招本年
順天鄉試中式舉人徐景春試卷文理荒謬經磨勘官籤出照例
斥革正副考官同考官均有應得處分著照該部此次所議正考
官全慶副考官胡家玉童華潘祖蔭均著降二級調用同考官著
卽行革職至此案正副考官同考官處分該部前奏辦理未能允
協所有禮部堂司各官著交部分別議處○諭禁內務府催索被
災蠲緩租銀○郭柏蔭以病免以吳元炳爲湖北巡撫涂宗瀛爲
湖南布政使崇福爲湖南按察使前甘肅按察使○己丑諭錢鼎銘添撥
黃河防險銀二十七萬四千兩○以崇實爲刑部尙書由鑲白旗蒙古都統
遷○以賀壽慈爲左都御史劉有銘爲刑部左侍郎由左副都御史遷○

以殷兆鏞爲吏部右侍郎

前禮部左侍郎

宋晉爲戶部左侍郎

由內閣學士遷

○

庚寅諭內閣前任陝西巡撫劉蓉前因剿賊失利降旨革職茲據

王文韶奏劉蓉於本年十月間在籍身故等語該員前在湖南湖

北四川陝西等省曾著戰功所有前得革職處分著加恩開復○

命工部右侍郎宜振恭辦

普祥峪萬年吉地工程○召王凱泰

入覲以李鶴年兼署福建巡撫

由閩浙總督署

○辛卯諭內閣文麟奏前

因哈密回子親王邁哈默特並伊母原任回子親王伯錫爾福晉

邁哈默特福晉均被回匪裹脅見經文麟將該王邁哈默特並邁

哈默特福晉尋救回城但伊等所住房屋及需用物件盡被蹂躪

其伯錫爾福晉尙未尋獲一摺該回子親王邁哈默特突遭大難

堅守不變深堪嘉尙著加恩賞給該王銀二萬兩由戶部撥給交

文麟轉交該王以示體恤仍著文麟務將伯錫爾福晉尋獲回密

妥爲安撫俟尋獲時卽速奏聞以副朕矜恤回臣之至意○諭軍機大臣等文麟奏追剿竄匪獲勝請催各省欠餉並飭部撥銀五萬兩請飭常順等安設北路臺站各摺片圍逼哈密賊匪自援軍擊敗後竄至瞭墩地方經誠慶等跟蹤追剿斃賊多名將回王邁哈默特等救出惟纏頭去而從賊恐勾結吐魯番回逆仍復竄擾哈密亟應嚴加防範著文麟等督飭各將士將城守事宜妥籌布置不得以賊蹤已遠稍涉疏懈臺站爲運道所關見在北路蒙古各臺被擾均已逃避自應趕緊安設著常順等迅飭蒙古人等將頭二三臺以及北路各臺速爲安設以通運路刻下哈密需餉甚殷卽著照文麟所請由戶部籌撥銀五萬兩迅速解交察哈爾都統衙門收存卽由文麟等派員迎提其各省應撥哈密餉銀著戶部咨催各該省督撫飭令藩司迅速撥解毋任遲延回城被賊搶

掠該回王等情形困苦殊深。廕念本日已明降清字諭旨賞給該回王銀二萬兩，由戶部解往著文麟等即將此旨宣示，並著妥爲安撫。將此由五百里各諭令知之。○壬辰原任漕運總督袁甲三母郭氏百歲生辰，頒御書扁額旌賞如例。○癸巳飭山西迅解甯夏欠餉。○甲午上詣大高殿祈雪。○丙申諭內閣：見在肅州克復關內肅清，因思已故廣東陸路提督劉松山前在甘肅督兵勦賊卓著戰功，嗣因深入重險，遇伏捐軀，追念前勞殊深，矜憫劉松山業經得有三等輕車都尉世職，著再加一等輕車都尉世職，令其嗣子承襲，以彰忠藎。○諭劉坤一奏遵旨據實覆奏一招據稱查明胡家玉及其弟姪田畝，歷年應完錢糧實有未曾被災，辦緩仍未完納者，丁漕改章一案。胡家玉曾貽該撫書信，並非該撫先行致函等語。胡家玉本籍田畝應完錢糧既未完納，又將丁

漕改章一事致書地方官均屬不合降調左都御史胡家玉著交部議處○左宗棠奏臣奉 上諭見在關內肅清隴右大兵雲集自應乘此聲威分別西征左宗棠身任兼圻責無旁貸著卽統籌各軍所需糧餉軍火等項每月應用若干寬爲豫備陸續轉輸如果各該軍逗畱不進則罪在主將儻因糧餉不繼致誤戎機朕惟左宗棠是問關外情形究竟若何糧運道路若何鎮迪以東俱總督統轄之地著卽詳細查明繪圖呈覽河州狄道回情是否安帖該大臣督辦糧運自應駐紮肅州蘭州省城祇有藩臬駐紮是否足恃西甯安插各回眾能否不滋事端並著左宗棠豫師據實具奏左宗棠所部各隊久在邊陲其中疲乏者諒亦不少自應分別遣撤將得力之師分紮各要害以資彈壓值此餉項支絀之時尤宜汰弱畱強以節糜費欽此跪誦之下欽仰我 皇上軫念西陲

洞矚邊務際此關隴肅清爲邊塞一勞永逸之計申命諸將剋期出關疆臣總司糧餉分別責任迅赴戎機在事文武諸臣懍遵

聖訓敢不殫誠竭慮以求仰慰宸厯竊維由肅州出嘉峪而西

本漢唐師行大道關內外風土相同非有洪濤巨浸崇山峻嶺足妨戎馬也安西玉門敦煌近雖遭白逆股匪擾掠一空然使關內之糧足供裹帶車馱隻足供周轉無庸仰給安西出關之兵何憚不進近時軍情無復以出關爲苦者以此然徒言出關固尙非難至由安西抵哈密計程十一站千里而遙經由戈壁無臺站無水草砂磧縱橫人馬每多困蹶中間僅安西城北四站馬蓮井尙可支帳小憩以備汲飲而亦未可久畱過此又七站始抵哈密回城地暖而腴爲纏頭回族聚居之所軍興以來音耗闊絕近被白逆股匪竄擾是否有餘糧足供採買更無從知

臣前在肅與諸軍

集議官軍分起次第行走必先將甘涼採買糧料運存肅州又由肅州出關運至玉門然後頭起開拔至玉門又用其私駝轉搬玉門存糧以赴安西騰出官駝官車轉運第二起軍糧而後第二起繼進餘軍仿照辦理此抵安西州作一停頓又裹糧運哈密如此層遞銜接人畜之力方稍舒展而士氣常新可免意外之慮至由哈密前進所有糧運事宜斷非臣力所及自古至今從未有運涼甘肅之糧濟哈密以西軍食者語云千里饋糧士有飢色言其不宿飽也今涼甘肅之糧運哈密計程實近三千而所歷又皆兵燹之餘砂鹵之地其勞費顧待問哉諭旨飭金順額爾慶額由哈密進古城與景廉會師金順等至安西州搬齊糧料必一面遣人赴哈密詢訪就近堪資採買者若干以定進止如就近有可設措自不須轉搬安西存糧以節勞費而張曜所部遵旨進哈密即可藉

資其糧以進時距麥熟之期亦當不遠舊糧漸盡新穀旋升後此
續進之軍方可相時而動臣所擬宋慶之軍及臣部精選之軍蓄
銳待發自可不誤師期諭旨飭穆圖善率所部進駐安敦玉爲諸
軍後繼飭臣統籌糧餉軍火等項寬爲豫備陸續轉輸毋令稍有
缺誤穆圖善欽奉諭旨感激奮興固不待言微臣具有天良又新
蒙特恩至優極渥苟有一籌可展竟敢稍惜心力致煩 聖厯撫
衷自問何以爲安顧無如時地足以限之關內之糧搜購無餘非
待明秋無從加採而前進各軍能否就近採買騰關外存糧以供
繼進之軍又難懸擬若勉挪前進各軍糧料以應穆圖善則前進
各軍中途缺食大局不堪設想若不挪前進存糧以應穆圖善續
至之軍一飽無時又將何策以善其後故於接到穆圖善咨時業
將一切實在情形縷悉咨覆請其將隊伍暫駐涇州平涼一帶遵

旨陞見面陳此時急赴安西於大局有損無益確實情由伏候

聖慈詳示機宜俾有遵循大局之幸亦微臣與穆圖善之幸也至

金順張曜兩軍各有專餉無待臣籌額爾慶額所統吉林馬隊二

百騎黑龍江馬隊百騎穆圖善委解存餉三萬兩甚爲充裕其自

挑涼州滿營百騎及臣撥交桂錫楨馬隊一營一起臣已各撥滿

餉四箇月交額爾慶額並撥購到口馬二百五十匹健駝二百隻

洋馬礮軍械各件以壯其行出關各軍所需軍火見解肅州者堪

資一年之用如遇各軍餉到稍遲必應墊發者臣自當相其緩急

應之惟臣軍餉項奇絀久在洞鑒之中如各軍視爲公中糧臺取

攜自便無論點金乏術缺誤必多且將來款目轆轤過多從何銷

算此非由部臣派員專立一案隨時考覈嚴切催提不可非臣力

所及也諭旨垂詢河州狄道回情是否安帖該大臣督辦糧運自

應駐紮肅州蘭州省城祇有藩臬駐紮是否足恃西甯安插各回眾能否不滋事端並著左宗棠豫師據實具奏臣維甘肅一省變亂十餘年被禍慘烈甲於天下所以然者回變與髮逆捻逆不同而甘回與陝回起衅緣由又異當時辦法未能苦心分明遂致紛紜日甚不可收拾也陝回之禍由於漢回構怨已久起衅之故實由漢民而匪回乘機構變並敢戕害團防大臣據地阻兵法難曲貸迨官軍屢予痛勦兇悍首逆馬政和楊文治于彥祿等均已授首悍賊殄滅已多所存無幾國法已伸其餘首從各逆既俯首輸誠自可概邀寬典安置甘境與漢民異處以杜衅端通計陝回七八十萬見存者除白彥虎股內二千有奇此外安插甘境者不過六萬餘眾而已甘回雖不如陝回之悍然人數較多自乾隆年間新教潛入內地久懷不軌詭謀秘計在入室操戈居心圖謀不軌

與國爲仇橫亘北數省無所畏忌是法所必誅時不可緩者也辦法宜嚴首惡不可稍縱倖托 皇上福庇事機順利首逆馬化隆父子馬桂源兄弟及馬四等次第伏誅其餘各目懷異志者亦已悉數芟夷而後安西肅州甘州涼州一帶二千餘里並無回族聚處實漢唐以來未有之奇竊計後此疆臣能慎擇廉明守令分布各郡縣毋有擾累興教勸學潛移民俗化其愚頑則雖百世相安可也至西甯本蒙漢回番雜處之區循化貴德巴燕戎格尤多回番而漢民頗少由西甯徑達關外有路可通不必取道嘉峪臣飭劉錦棠於明春解凍時親歷各隘擇要修築堡寨調撥兵勇分駐絕關外相通蹊徑以便盤詰而晝郊圻就回番之情言之番愚回狡一經不法之徒造謠鼓煽易生事端蓋新定之區恩信孚洽未久也然一經持平辦理旋即帖服察看情形轄境均尙安帖不獨

河狄也。臣宗棠料理運糧事宜畢，仍回蘭州。一爲安插肅州漢回難民，一爲河湟客土難民，有准於收穫後遷徙安插者，應速籌辦理，以期永久。一爲欠項積久，遣撤無資，而蒙恩飭撥部款百萬兩，一時難以速到，應及早豫爲籌畫。庶明春分別辦理，易於措手。至糧運事宜繁重，仍在得人而理。臣不駐肅州，亦可隨時料量耳。又奏竊肅州克復，大軍應卽乘勝出關，速圖埽蕩，人皆知之。而能言之臣始念亦謂巧遲不如拙速，及體察軍情，詳審局勢，竊有不敢輕議者，請爲我皇上敬陳之一。在籌出關之兵，宜審也。通計攻肅各軍，金順、宋慶、徐占彪及臣節次調派馬步各起共六十餘營，可謂多矣。然攻堅旣久，損折實多，受傷成廢者亦不下數千之眾。皆所稱精銳之選也。徐占彪所部蜀軍馬步十三營，前後陣亡將士五百餘員，名帶傷者二千四百有奇。宋慶一軍傷亡之數近千。

名而染病物故者亦數百計金順所部步軍卽胡世英之英禮十營本非佳選又由甯夏拔赴涼州時逃亡不少雖幸金順隨時補輯得以成軍每戰身先作其勇氣然陣亡者數百名受傷殘廢者亦數百計此臣在肅時所深悉者肅城克復後臣與諸軍熟商非從新整理難收實效金順宋慶徐占彪均以爲然比飭隨帶之總兵戴洪勝奈起立提督金慶元副將歐陽吉星等歸頭品頂戴記名提督譚上連統領併成五營益以馬隊三營駐守肅城修葺城濠俾成雄鎮飭肅州鎮總兵章洪勝接統楊世俊舊部馬步四營及親兵小隊駐嘉峪重修邊城以嚴鎖鑰並撥馬步小隊分駐關外以通玉門之氣其玉門靖逆營遊擊缺委隨營總兵銜副將陳南波署理安西協護將缺委隨營提督吳次漢署理敦煌沙州營參將缺委隨營副將聶福田署理各令挑汰存營孱弱兵丁而募

山內獵戶補之各足一營五百名實數照內地防勇章程資以月
餉責其防守本境兼護運道糾游勇臣巡視嘉峪關畢回肅卽撤
徐占彪馬步七營分別回籍挑留精壯併成馬步六營於肅城外
擇水草便利處紮營按日操練亦便其養傷待愈耳時因出關期
近諸軍整理需時奏調張曜嵩武軍由鎮番涼州赴肅而嵩武軍
到肅後軍食日增甘涼訂買運肅之糧不敷接濟各軍之用不得
已商請宋慶率所部回涼州整理兼以就食宋慶又以舊部在豫
者多募補易於集事而金順出關在卽擬以所部見存精壯聽金
順挑補額數俾期捷便臣服其力顧大局深知緩急並愜私懷旋
並撥副將馮桂增馬隊一營布洛斯螺絲後膛開花大礮一尊飭
總兵鄧增帶領礮手隨金順出關以從其欲計此時整理就緒壁
壘一新矣張曜一軍馬步十四營隊伍整肅士飽馬騰堪稱勁旅

臣並益以新製連架劈山礮十尊布洛斯二號螺絲後膛礮一尊七響後膛礮十桿其涼州副都統額爾慶額馬隊除自挑涼州滿營百騎外穆圖善撥交吉林二百騎黑龍江一百騎臣慮其單飭總兵桂錫楨帶所部馬隊一營一起約四百騎歸其統帶計金張額三軍出關馬步共一萬數千幸皆精實可用數月而後仍可調撥勁軍陸續繼進如此士氣常新而不竭糧運常裕而不飢以之制關外客土逆回自操十全之算一在籌出關之糧運宜審也肅州安西共隸一道而產糧贏絀各屬攸殊肅州及高臺腴地也安西玉門頗多砂瘠而敦煌爲上腴軍興以來民困於逆回之擄掠復苦於軍營之捐攤久矣民人存者不過十之三四地畝荒廢居其大半官軍藉興屯之名先給領籽種牛價抵算採買糧銀接括抑勒戶口流亡自白逆竄出關外官軍復沒屯莊被陷安敦玉彫

劫之狀較甚從前臣在肅見難民絡繹入關恐轉徙日多荒地無人耕墾籌銀二萬兩分給三州縣並撥寒衣萬套賑之冀留此災黎盡力屯墾庶異時餘糧出糶關外各軍可就近採買稍節勞費也然目前軍食不能取給安西則固不待言甘涼肅素稱腴地頻年戎馬被害最苦自徐占彪偏師徑擣肅州肅回縮退諸軍戡定河湟甘涼道路漸次肅清農民得安耕穫倖獲中稔兩年以來尙供官軍採買然死亡既多川原耕種不過十之三四其旱地更無過問者臣由蘭到肅途間疊據土民紛紛遞呈求免採買比經再三開導除畱民食及籽種外諭其悉數出糶勿任居奇幸三郡民情樸愿又知官軍誓滅此賊且能不擾遂得集有成數通計涼甘肅三郡訂買市斗軍糧十六萬三千餘石按照額徵倉斗則三十餘萬石幾敵通省常年額賦雖優議價值每市斗一石重三百餘

斤給銀四兩而民間繳納不前市價驟長每石竟至六七兩之多據甘州府縣稟報棍徒喬良廷卽喬鐸李太和造謠煽惑阻納官糧以致市肆擡價居奇貧民糶食無出軍民均困臣察訪得實立飭將喬良廷李太和杖斃並以署甘涼道蕭宗幹辦理瀕預撤任查辦訪聞局員候選知縣杜輔仁甘標後營都司林長興有侵欺情事交調署甘涼道黃慶章訊實詳參自此民間交糧乃漸踴躍然以訂買糧料總數供金順張曜額爾慶額三軍食用及運糧車馱駝隻防營所需食用算至明歲六月新熟尙短糧料市斗二萬餘石見擬盡括額徵本色及各標營季糧陸續填補尙未知能否足敷且甘肅地氣高寒麥秋雖在六月而民間割麥完畢必應堆積成垛俟其稟糜秸脫始便碾打上市臣此次七月十九日由蘭州啟行八月十二日始抵肅州沿途村舍麥垛雖多而繳官上市

者少明歲節候雖早計民間繳納新糧必俟八月陳糧尙應寬籌
兩月庶新熟之交得資接濟此籌糧甘苦之實在情形也就轉運
言之自涼州至肅州共九百里又自肅州至嘉峪關至玉門縣三
百六十里玉門至安西又二百里其一千四百餘里路多砂石用
駝爲宜惟駝隻非農家所蓄向來民間所蓄惟騾馬牛驢以供農
事藉應差徭所有惟木輪大車不耐負重行遠頻年賊回擾掠牲
畜極少差車無供上年成祿出關強拉差車數百輛甫至玉門車
夫棄車逃回並騾馬亦拋置不顧自是更無從措手臣於夏初派
弁三路出口採駝三千又偏置蒙古駝少價昂採獲尙不及一千
二三百隻報到者僅止六百餘隻臣過甘郡時道府請重價雇用
民車每運糧百斤行百里許給銀四錢其應出差車許給銀二錢
計四十餘日之久民車差車運糧料到局尙不滿三千石幸臣前

調集各營官騾一千六百餘先後到齊起運勉資周轉而前用民價在蘭州平涼所雇商民車馱駝隻及袁保恆在河雇辦車輛亦陸續搭運軍裝軍火抵甘於是轉運稍旺肅州乃有存糧以後可不須重價雇民車然通計由涼州甘州採糧運肅由肅駝運至安西州合計民運車馱駝隻腳價及官車官騾官駝員弁人夫薪糧牲畜草料口袋什物局費一切攤算每糧百斤需銀十一兩七錢內外其勞如此其費如此夫豈此時才力所堪若非豫籌撙節而勦言用眾恐官軍之餉餽不繼精臺之儲峙早空不但後時不能保此不竭之源卽目前出關之師亦且時憂飢潰此轉運艱難之實在情形也竊維自古關塞用兵在精不在多方全盛時籌用兵卽先籌芻粟如漢趙充國古稱名將其駐軍酒泉卽今之肅州治敦煌卽今之安西州治所籌兵事重屯田而罷騎兵畱步兵萬人

藉省大費三奏力諍行之卒效至今言西北兵事者莫能外也乾隆間先臣兆惠苦守伊犁數月維時北路兵阻不前其深入者僅精兵數百卒能力解重圍宣威絕域約計當時北路士馬多亦不過數千然則道遠運艱不能用眾卽古今承平無事官私充足時亦無以異可知也今擬出關之金順張曜額爾慶額所部馬步已一萬數千合之員弁丁役人夫將近兩萬值哈密嚴解賊蹤向吐魯番一帶竄走師行二千里尙未知能否及賊若遽擬以大軍接踵前進雖承平無事官私充裕時猶或難之矧當禍亂十年人物彫殘財用匱絕之日乎臣在肅時商之各軍汰疲乏冗雜弁丁以求精資遣傷殘成廢弁兵以省累察張曜一軍銳氣方新作爲頭起金順一軍次之額爾慶額又次之宋慶一軍整理需時軍裝駝隻均須增添購辦請畱俟明年秋後繼發臣並擬於所部整銳足

恃諸軍內再精選數千屆時慎擇統將率之同行如天之福甘涼
安肅明歲豐稔西師飽騰再分起層遞而前如行衽席庶邊塞肅
清可操全算計期不過稍遲數月而局勢穩矣否則師行荒徼既
不能因糧於敵復不能隨地徵糧士馬苦於長征求一飽而不得
正恐未及遇賊軍情先搖於局勢無益而又害之且戰陣之事最
忌於前突後竭行軍布陣壯士利器厚集於後則前隊得勢鋒銳
有加戰勝而兵力愈增必勝之著也若全力悉注前行一洩無餘
設有蹉跌無復後繼是乃危道詩言緜緜翼翼傳稱彼竭我盈蓋
皆注意後路之說況出關之師所應加意者不僅哈密以西客土
各回似成效不在欲速取威不僅一戰也區區之愚所爲不能自
釋者以此至關外軍事除景廉每年尙閒有緘牘往來餘則並未
接過隻字卽鎮迪一道名雖隸陝甘總督管轄而實則由烏魯木

齊都統及各大臣就近督率公事一切由其主持數十年前卽是如此臣無從過問所有哈密以西糧運事宜應由出關各軍到地自行籌畫臣固未能懸揣亦勢力所不逮非豫爲諉謝也 上諭軍機大臣等官軍攻克肅州後亟應乘勝出關速圖西進左宗棠擬令張曜一軍作爲頭起金順額爾慶額兩軍次第起行宋慶一軍暫回甯夏整理軍裝各項請俟明年秋後與該大臣精選之軍陸續繼發所籌不爲無見卽著飭令各軍分起前進迅掃逆氛該軍糧運事宜仍著該大臣妥爲籌畫俾收飽騰之效糧臺事極繁重固在得人而理如有必須該大臣前赴肅州親爲料簡之處仍應馳往督辦省垣一切事宜據奏有崇保等經理得宜自可無慮張曜各軍人數將近兩萬兵力不薄而遠道籌糧實非易易穆圖善所部著暫駐紮涇州平涼一帶並著將所部步隊概行撤遣仍

帶所部吉林黑龍江馬隊俟來年宋慶一軍整理就緒及左宗棠精選之軍派員管帶後併交穆圖善總統前進扼紮安敦玉一帶督辦轉運事宜其採糧一切仍著左宗棠飭屬妥爲經理所有應撤步隊著穆圖善妥爲遣散毋令滋生事端官軍見經分起出關軍行糧隨不容稍有缺乏左宗棠以糧運進抵哈密已經層遞銜接始能運到由哈密前進糧運事宜勢難兼及亦屬實在情形將來各處官軍由哈密節節進剿應如何就地籌畫之處著景廉文麟明春慶壽與金順額爾慶額張曜宋慶臨時酌度情形妥爲辦理左宗棠仍當隨時察看力籌兼顧以期無誤軍精見在安西肅州甘涼一帶回匪悉數殲除地方均已安帖該大臣當將應辦各事宜次第妥爲籌布以竟全功景廉見在古城該處地方爲西路進兵要道古城領隊大臣一缺並其餘各城員缺刻尙虛懸如須

請旨簡放卽著景廉迅速具奏左宗棠另片奏請將該大臣所得一等輕車都尉世職追賞已故提督劉松山等語亦經明降諭旨將劉松山加賞一等輕車都尉世職令其嗣子承襲請將所得世職推讓之處著毋庸議將此由六百里諭知左宗棠金順穆圖善景廉文麟明春額爾慶額並傳諭慶壽張曜宋慶知之○左宗棠奏用兵之要先審軍情古人所以於擇將兼聽與人之誦也此次諸軍乘勝出關士氣倍奮况諸統將新承恩旨受寵若驚所部樂事赴功自不待言惟餉饋盈絀隱繫軍情有急需體察者各軍餉事均由協餉省分解濟本有一定數目其解到多寡實數臣無由知然嘗詢之金順張曜宋慶得其大略以協餉實數按照員弁兵勇長夫均勻攤算計每名每年可得實銀三十餘兩餘除畱備製造添補軍需軍裝購買駝隻之用別無餘賸至糧料價值轉運腳

費按道里遠近牽算計每人所食月需淨糧四十五斤馬隊一騎
日需料五斤草十二斤兵勇長夫兩名所需食糧月需九十斤均
不可少照步軍攤算馬隊一營二百五十騎抵步隊一營五百人
長夫二百名之數其大略也各軍馬步兵勇每月應得實餉僅止
三兩有奇若按照食用糧料價腳攤扣則馬步兵勇將所得實餉
盡數賠繳尙須找銀繳局萬無是理若不按名按騎攤扣則糧料
價值轉運腳費等項又將何出應懇 天恩飭下戶部兵部會議
出關各軍應得正餉每名每月若干兩責成協餉省分按數如期
解濟此外糧料價值運腳共計需銀若干兩或責成協餉省分按
月搭解毋得延誤如協餉省分力有不及務須及早奏派鄰省按
月劃款協濟不令虛懸庶出關之軍餉饋均歸有著雖遠道轉戰
無殊近履階庭軍情益奮諸統將亦得所藉手以圖報稱壹意整

軍討賊勿敢遷延功效可必而朝廷以餉饋充絀課其赴機遲速法行令肅於軍政實有裨益應請飭下戶部揀派明幹司員將出關各軍餉需專立一案按月稽覈具報如協解省分稍有遲誤及餉到而各軍逗畱不進咎有攸歸庶餉需不催自急軍情慰愜無可藉口得旨該部速議具奏○予甘肅傷亡遊擊張林祭葬世職○丁酉諭直隸迅解兵部馬館地租銀兩○己亥飭各省迅解雲南欠餉○予雲南陣亡總兵官褚克昌建祠○辛丑諭內閣前據江西巡撫劉坤一陳奏降調左都御史胡家玉本籍田畝未完錢糧並有先貽該撫書信情事業將胡家玉交部議處茲據給事中邊寶泉奏稱胡家玉累次未完漕糧劉坤一豈漫無覺察何以事歷多年概置不問胡家玉既有干預原籍諸事之信何以不立時奏聞迨胡家玉條陳江西丁漕改章互相牴牾始行糾參藉端報

復挾私攻訐等語劉坤一於胡家玉本籍田畝未完漕糧當時並未奏參接胡家玉信函後又不卽行陳奏亦屬不合劉坤一著交部議處○壬寅諭內閣明年恭逢 慈禧端佑康頤皇太后四旬大慶並朕親政後初屆元日令辰允宜仰體 慈懷覃敷闡澤因念推恩之序首重親親孚郡王著賞銀三千兩多羅貝勒載治著賞銀二千兩俱由內給發惠郡王奕詳鎮國公奕謨均著交宗人府從優議敘多羅貝勒載澂著加郡王銜頭品頂帶載瀾著賞給三等輔國將軍頭品頂帶貼黃著賞戴花翎用示施恩錫類篤念宗支至意○諭明年恭逢 慈禧端佑康頤皇太后四旬大慶並朕親政後初屆元日令辰業經加恩近支王貝勒等因思中外王大臣有勤勞素著者亦宜特沛恩施恭親王文祥寶鋆均著交該衙門從優議敘沈桂芬著賞給御書扁額一方科爾沁親王伯彥

納謨祜多羅貝勒奕劻公景壽均著賞穿蟒貂褂大學士兩廣總督瑞麟大學士直隸總督李鴻章協辦大學士陝甘總督左宗棠均著交部從優議敘用示宣綸錫羨至意○賞軍機大臣工部尙書李鴻藻母姚氏 御書扁額○癸卯禘祭 太廟○是月蠲緩湖北沔陽等二十四州縣暨武昌衛被水被旱新舊額賦湖南澧州等十州縣暨岳州衛被水額賦雜課山西岢嵐等六州廳縣被水被雹新舊額賦倉穀河南鄭州等七十七州廳縣被水被旱新舊額賦並賑孟津縣災民一月口糧緩徵兩淮富安等十四場被水新舊竈課○會計天下民穀數除江蘇安徽雲南廣西陝西甘肅未經冊報外奉天等省通共大小男婦二萬七千七百一十三萬三千二百二十四名口存倉米穀二百八十四萬六千七百八十八石九斗八升六勺